

後漢藝文志

後漢藝文志卷四

姚氏學

集之類四曰楚辭曰文史曰別集曰總集附錄三種曰佛經曰道書

班固離騷經章句一卷

固始末具經部小學類

楚辭章句班孟堅序云昔在孝武博覽古文淮南王安敘離騷傳以爲國風好色而不淫小雅怨悱而不亂若離騷者可謂兼之蟬蛻濁穢之中浮游塵埃之外皜然泥而不滓推此志雖與日月爭光可也斯論似過其真又說五子以失家巷謂五子胥也及至羿澆少康貳姚有娥姚女皆各以所識有所增損然猶未得其正也故博采經書傳記本文以爲之解

賈逵離騷經章句一卷

逵始末具經部書類

王逸離騷經敘曰孝武皇帝恢廓道訓使淮南王安作離騷經章句逮至劉向典校經書分爲十六卷孝章卽位深弘道藝而班固賈逵復以所見改易前疑各作離騷經章句其餘十五卷缺而不說

按王叔師所言則班賈兩家皆以正淮南之失而更爲之注

馬融離騷傳一卷

融始末具經部易類

范書本傳注孝經論語詩易三禮尙書列女傳老子淮南子離騷

王逸楚辭章句十六卷

逸始末具史部地理類

范書文苑傳著楚辭章句行於世

逸自序曰逮至劉向典校經書分爲十六卷而班固賈逵各作離騷經章句其餘十五卷缺而不說又以壯爲狀一作扶義多乖異事不要括今臣復以所識所知稽之舊章合之經傳作十六卷章句雖未能究其微妙然大指之趣略可見矣

唐書經籍志楚辭十六卷王逸撰藝文志王逸注楚辭十六卷

按逸自序稱臣則當時嘗進於朝其本迄劉向九歎止於十六卷其自撰九思一篇不連在內兩唐志所載似卽其相傳經進本

王逸楚辭章句別本十七卷

隋書經籍志楚辭十二卷并目錄後漢校書郎王逸注
又曰校書郎王逸集屈原已下迄於劉向逸又自爲一
篇并敘而注之今行於世宋史藝文志楚辭十七卷後
漢王逸章句

四庫提要曰楚辭章句十七卷漢王逸撰初劉向哀集
屈原離騷以迄向所作九歎共爲楚辭十六卷是爲總
集之祖逸又益以己作九思一篇與班固二敘爲十七
卷而各爲之注其九思之注宋洪興祖疑其子延壽所
爲逸注雖不甚詳核而去古未遠多傳先儒之訓詁故
李善注文選全用其文抽思以下諸篇注中往往隔句

用韻如哀憤結緝慮煩冤也哀悲太息損肺肝也中心
結屈如連環也之類不一而足蓋仿周易象傳之體亦
足以攷證漢人之韻而吳棫以來談古韻者皆未徵引
是尤宜表而出之矣

右注解四家五部

梁竦悼騷一篇

范書梁統傳統安定烏氏人子松松弟竦字叔敬少習
孟氏易弱冠能教授後坐兄松事與弟恭俱徙九真既
徂南土歷江湖濟沅湘感悼于胥屈原以非辜沈身迺
作悼騷賦繫玄石而沈之顯宗後詔聽還本郡辟命交
至並無所就有三男三女肅宗納其二女皆爲貴人小

貴人生和帝竇皇后養以爲子建初八年諸竇譖殺二貴人而陷竦等以惡逆竦死漢陽獄中和帝永元九年追封諡竦爲哀親愍侯

宋洪興祖楚辭九思篇補注曰揚雄有廣騷梁竦有悼騷不知王逸奚罪其文不以二家之述爲離騷之兩派也

嚴可均全後漢文編曰梁竦悼騷賦傳注引東觀記載其文

梁竦七序

范書梁統附傳竦坐兄松事徙九真顯宗後詔聽還本郡竦閉門自養以經籍爲娛著書數篇名曰七序班固

見而稱之曰孔子著春秋而亂臣賊子懼梁竦作七序而竊位素餐者慙

按七序之文今不可攷見御覽載晉傅玄作七謨序歷數漢魏人所作篇目亦無七序之名劉勰文心雕龍亦未述焉袁宏紀云作經書數篇名曰七序豈說經之文歟而范史不云經書觀夫班氏之稱述則有似乎諷諭在位者今姑從楚辭東方朔七諫之例列之此

應奉感騷三十篇

奉始末具史部史鈔類

范書本傳及黨事起奉乃慨然以疾自退追愍屈原因以自傷著感騷三十篇數十萬言

右撰著二家三部

右楚辭類凡二門綜六家八部

光武受命中興頌

范書東平憲王傳永平十五年春行幸東平帝以所作光武本紀示蒼蒼因上光武受命中興頌帝甚善之以其文典雅特令校書郎賈逵爲之訓詁

東觀記曰蒼上世祖受命中興頌上甚善之以問校書郎此與誰等皆言類揚雄相如前世史岑之比

班固典引篇一卷

固序曰永平十七年臣與賈逵傅毅杜矩展隆郗萌等召詣雲龍門小黃門趙宣持泰始皇帝本紀問臣等曰

太史遷下贊語中寧有非耶臣對此贊賈誼過秦篇云
向使子嬰有庸主之才僅得中佐秦之社稷未宜絕也
此言非是卽召臣入問本聞此論非耶將見同意開寤
耶臣具對素聞知狀詔因曰司馬遷以身陷刑之故微
文刺譏貶損當世非誼士也司馬相如至於疾病而頌
述功德言封禪事忠臣效也賢遷遠矣臣固嘗伏誦聖
論昭明好惡不遺微細緣事斷誼動有規矩臣固不勝
區區竊作典引一篇云云

范書本傳固又作典引篇述敘漢德以爲相如封禪靡
而不典揚雄美新典而不實蓋自謂得其致焉

文心雕龍封禪篇班固典引體因紀禪又曰典引所敘

雅有懿采歷鑒前作能執厥中其致義會文斐然餘巧
故稱封禪麗而不典劇秦典而不實豈非追觀易爲明
循勢易爲力歟

臨邑侯復漢德頌

范書宗室四王傳建武三十年封北海王興子復爲臨
邑侯又曰臨邑侯復好學能文章永平中每有講學事
輒令復典掌焉與班固賈逵共述漢史傳毅等皆宗事
之章懷太子曰復光武兄伯升之孫也

范書劉平傳顯宗初尙書僕射鍾離意上書薦平及東
萊王符等有詔皆拜議郎永平中臨邑侯劉復著漢德
頌盛稱符爲名臣云

琅邪王京頌德詩賦

范書光武十王列傳琅邪孝王京建武十五年封琅邪公十七年進爵爲王京性恭孝好經學顯宗尤愛幸賞賜恩寵殊異莫與爲比永平五年乃就國京都葛好修宮室窮極伎巧殿館壁帶皆飾以金銀數上詩賦頌德帝嘉美下之史官立三十一年薨

傅毅顯宗頌十篇

范書文苑傳傅毅字武仲扶風茂陵人也少博學永平中于平陵習章句建初中肅宗博召文學之士以毅爲蘭臺令史拜郎中與班固賈逵共典校書毅追美孝明皇帝功德最盛而廟頌未立乃依清廟作顯宗頌十篇

奏之由是文雅顯於朝廷爲車騎將軍馬防軍司馬及馬氏敗免官歸永元元年車騎將軍竇憲復請毅爲主記室及憲遷大將軍復以毅爲司馬卒

困學紀聞曰論衡云班孟堅頌

孝明孟堅頌今亡蓋當時頌明帝者不止傅氏一家傳特其最著者

太平御覽五百八十八引文章流別傳曰傅毅顯宗頌

文與周頌相似而雜以風雅之意

嚴可均全後漢文編曰文選曹植責躬詩注引傅毅上

明帝頌表張華勵志詩注引傅毅顯宗頌

王景金人論

景始末具子部農家類

范書循吏傳建初七年遷徐州刺史先是杜陵杜篤奏上論遷都欲令車駕遷還長安耆老聞者皆動懷土之

心莫不眷然伫立西望景以宮廟已立恐人情疑惑會
時有神雀諸瑞乃作金人論頌洛邑之美天人之符文
有可采

楊終封禪書

終始末具史部正史類

華陽國志蜀郡人士贊終坐事徙邊作孤憤詩後又作
生民詩制封禪書皆傳於世者

按常道將所言楊子山
當有詩文集行世而七

錄隋志皆
無其目

楊終嘉瑞頌十五章

范書本傳終坐事徙北地帝東巡狩鳳皇黃龍並集終

贊頌嘉瑞上述祖宗鴻業凡十五章奏上詔賞還故郡

按事在章帝元和二年又賈逵傳逵上奏曰是以麟鳳
百數嘉瑞雜遝章懷太子曰章帝時鳳皇見百三十九

麒麟五十二白虎二十九黃龍三十四
神雀白燕等史官不可勝紀見東觀記

常璩蜀郡人士贊又上符瑞詩十五章

崔駰四巡頌

駰始末具史部儀制類

范書本傳元和中肅宗始修古禮巡狩方嶽駰上四巡
頌以稱漢德辭甚典美

玉海卷六十引此下帝雅好文有文多故不載五字

章自見駰頌後常嗟歎之謂侍中竇憲曰卿寧知崔駰
乎對曰班固數爲臣說之然未見也帝曰公愛班固而
忽崔駰此葉公之好龍也試請見之駰由此候憲入爲
上客

嚴可均全後漢文編曰崔駰四巡頌初學記十三藝文
類聚三十七御覽三百四十又五百三十七引數條并

上表

史岑和熹鄧后頌

文選史孝山出師頌注云漢有二史岑字子孝者仕王莽之末字孝山者當和熹之際書典散亡未詳孝山爵里文章志及集林今書七志並載岑出師頌而流別集及集林又載岑和熹鄧后頌并序

太平御覽五百八十八引文章流別集曰史岑爲出師頌和熹鄧后頌與魯頌體意相類而文辭之異古今之變也

文心雕龍頌讚篇曰武仲之美顯宗史岑之述熹后或擬清廟或範駟那雖淺深不同詳略各異其褒德顯容

典章一也

按范書和熹鄧后紀元初五年平望侯劉毅以太后多德政上書安帝請令史官著長樂宮聖德頌帝從之此或卽是聖德頌之一審如是則史岑者安帝時史官也

劉毅漢德論并憲論十二篇

范書文苑傳劉毅北海敬王子也初封平望侯永元中坐事奪爵毅少有文辯稱元初元年上漢德論并憲論十二篇時劉珍鄧耽尹兌馬融共上書稱其美安帝嘉之賜錢三萬拜議郎

毅上此論下東觀諸儒詳定於是劉珍等四人上言稱其美其事固

可恨見也

又宗室四王傳北海敬王睦立十年薨子哀王基嗣永平十八年封基二弟爲縣侯二弟爲鄉侯建初二年又封基地毅爲平望侯毅有才學永寧中鄧太后召毅及劉駒駘入東觀與謁者僕射劉珍著中興以下名臣列士傳

王逸漢詩百二十篇

逸始末見史部地理類

范書文苑傳又作漢詩百二十三篇

曹朔漢頌四篇

漢書文苑蘇順傳又有曹朔不知何許人作漢頌四篇

按扶風曹氏世大族疑卽曹壽曹成曹眾之同族

右文史類凡一十二家一十三部

按隋經籍志以詩文中之解釋評論者并附見於總集篇崇文總目始於別集後立爲文史類唐藝文志又兼用隋志之例次總集末今變其例以詩賦論頌之關乎史事者類爲此篇其文皆發揚盛美淵色淵業朝夕論思日月獻納非私家編錄可比故冠於別集類之首焉

王莽中謁者史岑集二集

范書文苑王隆傳初王莽末沛國史岑子孝亦以文章顯莽以爲謁者著頌誄復神說疾凡四篇章懷太子注云岑一字孝山著出師頌文選出師頌注云漢有二史岑字孝山者當和熹之際字子孝者仕莽末章懷此注誤爲一人按史岑當亦卒於建武時故范以王隆合傳

博物志元始元年中謁者沛郡史岑上書訟王宏奪董

賢璽綬之功

按王宏卽王闕詳見史部雜傳記類

史通正史篇史記所書年止漢武其後劉向向子歆及諸好事者若揚雄史岑等相次撰續迄於哀平閒

隋書經籍志梁有王莽中謁者史岑集二卷唐經籍志

史岑集二卷藝文志同

王莽建新大尹崔篆集一卷

篆始末具子部五行類范書本傳注曰莽改十乘郡曰建新

守曰大尹

范書崔駰傳篆自以宗門受莽僞寵慚媿漢朝臨終作

賦以自傷悼名慰志

隋書經籍志梁有王莽建新大尹崔篆集一卷亡唐經

籍志崔篆集一卷藝文志同

嚴可均全漢文編崔篆有集一卷今惟見崔駰傳所載
慰志賦一篇

六安郡丞桓譚集二十六篇

譚始末具經部樂類

范書本傳所著賦誄書奏凡二十六篇

文心雕龍才略篇桓譚著論富號猗頓宋弘稱薦爰比
相如而集靈諸賦偏淺無才故知長於諷諭不及麗文
也

隋書經籍志梁有桓譚集五卷亡唐經籍志後漢桓譚
集二卷藝文志同

嚴氏全後漢文編桓譚有集五卷本傳有陳時政疏抑

識重賞疏北堂書鈔藝文類聚有仙賦并序文選注有
上便宜陳便宜啟事答揚雄書凡七篇

侍中蘇竟集

范書本傳竟字伯況扶風平陵人也平帝世以明易爲
博士講書祭酒善圖緯能通百家之言王莽時與劉歆
等共典校書拜代郡中尉光武卽位就拜代郡太守建
武五年冬詣京師拜侍中數月以病免初延岑護軍鄧
仲況擁兵據南陽陰縣爲寇而劉歆兄子襲爲其謀主
竟時在南陽與襲書曉之曰云云又與仲況書諫之文
多不載於是仲況與襲遂降竟終不伐其功潛樂道術
作記誨篇及文章傳世年七十卒於家

隋書天文志曰漢之傳天數者光武時則有蘇伯況郎
雅光並能參伍天文發揚善道補益當時監垂來世按
顯字雅光范書有
傳實安帝時人

按是集隋志不著錄非無集也蓋久佚之耳今唯據
史傳及他書所載者錄而存之下並同此例竟在先
漢爲易博士與劉歆典校中祕書固兩漢間碩儒其
記誨篇似別爲一表不知當何屬今附於此不別出
隋志所云發揚善道補益當時者今亦唯本傳所載
與劉孟公書略見之

新汲令王隆集二十六篇

隆始末見史部職官類

范書文苑傳隆能文章所著詩賦銘書凡二十六篇

隋書經籍志梁有王隆集二卷亡唐經籍志王文山集

二卷藝文志同

泰山都尉夏恭集二十卷

范書文苑傳夏恭字敬公梁國蒙人也習韓詩孟氏易講授門徒常千餘人王莽末盜賊縱橫攻沒郡縣恭以恩信爲眾所附擁兵固守獨安全光武卽位嘉其忠果召拜郎中再遷太山都尉恭善爲文著賦頌詩勵學凡二十篇四十九卒官

四上脫年字

諸儒共論曰宣明君

司徒掾陳元集一卷

元始末具經部春秋類

范書本傳上疏請建立左氏春秋上疏言不宜令司隸督察三公後辟司徒歐陽欽府數陳當世便事郊廟之

禮子堅卿有文章又儒林歐陽歆傳歆死獄中歆掾陳

元上書追訟之言甚切至

按歆死時在建武十五年又按賢章傳云章好學有文

章七錄有賢章集二卷此云堅卿有文章則堅卿亦當有集今不可攷或并附其父集後故范氏合而言之未可知也

隋書經籍志梁又有司徒掾陳元集一卷亡

嚴氏文編陳元有集一卷今本傳有上疏雖范升奏左氏不宜立博士上疏駁江馮督察三公議各一篇

議郎衛宏集七首

宏始末具經部書類

范書儒林傳宏作漢舊儀四篇又著賦頌誄七首皆傳於世

嚴氏文編史記鼂錯傳儒林傳正義後漢書陳蕃傳注

引衛宏詔定古文官書序

按宏之遺文僅此并不在賦誄頌七首之內

徐令班彪集九篇

彪始末具史部正史類

范書本傳所著賦論書記奏事合九篇

文心雕龍才略篇曰二班兩劉奕葉繼采舊說以爲固
文優彪歆學精向然王命清辨新序該練璿璧產於崑
岡亦難得而踰本矣又哀弔篇云自賈誼浮湘發憤弔
屈首出之作也班彪蔡邕並敏於致語然影附賈氏難
爲並驅耳

隋書經籍志後漢徐令班彪集二卷梁五卷唐經籍志
班彪集二卷藝文志班彪集三卷

嚴氏文編班彪有集五卷今諸書所引有覽海賦北征

賦冀州賦悼離騷復護羌校尉疏上言宜復置烏桓校尉上言宜選東宮及諸王國官屬奏事上事奏議答北匈奴與京兆丞郭季通書與金昭卿書王命論史記論凡一十四篇

按本傳彪爲望都長卒官隋志題徐令其初入朝時所除官也或舊集原題如此又史言光武問竇融所上奏章誰與參定融對皆從事班彪所爲則融傳及袁宏紀所載上書歸誠上書請征隗囂與隗囂書並在河西時事或叔皮之辭

雲陽令朱勃集二卷

東觀記朱勃字叔陽扶風平陵人年十二能誦詩書未

二十右扶風請試守渭城宰及馬援爲將軍封侯而勃
位不過縣令援嘗待以舊恩而卑侮之勃愈身自親及
援遇讒惟勃能終焉章帝下詔曰告平陵令丞縣人故
雲陽令朱勃建武中以伏波將軍爵土不傳上書陳狀
不顧罪戾懷旌善之志有烈士之風其以縣見穀二千
石賜勃子若孫勿令遠詣闕謝范書附見
馬援傳中
隋書經籍志梁有雲陽令朱勃集二卷亡唐經籍志朱
勃集二卷藝文志同

嚴氏文編朱勃有集二卷今見袁宏紀載勃詣闕上書
理焉援一篇亦見援傳

司隸從事馮衍集五十篇

范書本傳衍字敬通京兆杜陵人也幼有奇才年二十而博通羣書王莽時天下兵起莽遣更始將軍廉丹討伐山東辟衍爲掾丹與赤眉戰死衍乃亡命河東更始遣尙書僕射鮑永行大將軍事安集北方以衍爲立漢將軍領狼孟長屯太原後審知更始歿乃與永罷兵幅巾降於河內帝怨衍等不時至永以立功得贖罪遂任用之而衍獨見黜頃之以爲曲陽令後爲司隸從事又得罪西歸故郡閉門自保不敢復與親故通建武末上疏自陳猶以前過不用衍不得志退而作賦自厲命其篇曰顯志顯志者言光明風化之情昭章玄妙之思也顯宗卽位又多短衍以文過其實遂廢於家衍娶北地

女任氏悍忌不得畜媵妾兒女常自操井曰老竟逐之
遂坎塿於時居貧年老卒於家所著賦誄銘說問交德
誥愼情書記說自序官錄說策五十篇肅宗甚重其文
文心雕龍才略篇敬通雅好辭說而坎塿盛世顯志自
序亦蚌病成珠矣又銘箴篇云至如敬通雜器準燹戒
銘而事非其物繁略違中論說篇云敬通之說鮑鄧事
緩而文繁所以歷聘而罕遇也

章懷太子曰衍集有與陰就書與婦弟任武達書與宣
孟書有問交一篇愼情一篇又曰衍集見有二十八篇
隋書經籍志後漢司隸從事馮衍集五卷唐經籍志馮
衍集五卷藝文志同

明張溥漢魏六朝百三家集馮敬通曲陽集輯本一卷
凡賦疏奏記牋書論銘一十七篇

嚴氏文編馮衍有集五卷今見於本傳傳注及袁紀選

注初學記類聚御覽有賦上疏上書說書德誥銘凡二

十七篇錄爲一卷

悲棟後漢書補注云北堂書鈔九十八卷引馮敬通自序

東平憲王集五卷

東平王見經部小學類

范書光武十王列傳建初八年正月薨詔告中傳封上

蒼自建武以來章奏及所作書記賦頌七言別字歌詩

並集覽焉

隋書經籍志梁有後漢東平王蒼集五卷亡唐經籍志

漢東平王集二卷藝文志東平王蒼集二卷

嚴氏文編東平王有集五卷今見於本傳吳良傳東觀
記續漢志袁紀通典諸書有疏議上書上言凡九篇明
馮惟訥詩紀輯存武德舞歌詩一篇

北海敬王集數十篇

北海王見經部春秋類

范書宗室四王列傳北海敬王睦能屬文作春秋旨義
終始論及賦頌數十篇

車騎從事杜篤集十八篇

篤始末具子部儒家類

范書文苑傳大司馬吳漢薨光武詔諸儒誄之篤爲誄
辭最高帝美之賜帛篤以關中表裏山河先帝舊京不
宜改營洛邑迺上奏論都賦又曰所著賦誄弔書贊七
言女誡及雜文凡十八篇

文心雕龍才略篇曰杜篤賈逵亦有聲於文跡其爲才
崔傳之末流也又誄碑篇云杜篤之誄有譽前代吳誄
雖工而他篇頗疏豈以見稱光武而改盼千金哉

隋書經籍志後漢車騎從事杜篤集一卷唐經籍志杜
篤集五卷藝文志同

嚴氏文編杜篤有集一卷今本傳及諸書所引有祓禊
賦首陽山賦論都賦書摠賦眾瑞賦眾瑞頌通邊論展
武論連珠迎鍾文祿祝吳漢誄弔比干文凡一十四篇
車騎司馬傳毅集二十八篇

毅始末見前文史類

范書文苑傳永平中于平陵習章句因作迫志詩以顯
宗求賢不篤士多隱處故作七激以爲諷又曰著詩賦

誄頌祝文七激連珠凡二十八篇

文心雕龍明詩篇曰又古詩佳麗或稱校叔其孤竹一

篇則傅毅之詞

黃叔琳曰謂古詩十九首冉冉孤生竹篇也

又頌贊篇云至

於班傅之北征西巡變爲序引豈不褒過而謬體哉又誄碑篇云傅毅所製文體倫序至於序述哀情則觸類而長毅之誄北海云白日幽光霧霧杳冥始序致感遂爲後式景而效者彌取於工矣雜文篇云傅毅七激會清要之工

隋書經籍志後漢車騎司馬傅毅集二卷梁五卷又總集篇神雀賦一卷後漢傅毅撰唐經籍志傅毅集五卷

藝文志同

嚴氏文編傳毅有集五卷今從諸書所引有洛都賦反
都賦舞賦雅琴賦扇賦與荆文姜書七激顯宗頌竇將
軍北征頌西征頌扇銘明帝誄北海王誄凡一十三篇
馮氏詩紀錄存迪志詩一篇

舉孝廉夏牙集四十篇

范書文苑夏恭傳恭梁國蒙人也子牙少習家業著賦
頌讚誄凡四十篇舉孝廉早卒鄉人號曰文德先生

臨淮袁文術箴銘

論衡案書篇曰臨淮袁太伯袁文術囊橐文雅之英雄
也觀太伯之易章句文術之箴銘劉子政揚子雲不能
過也

按臨淮二袁大抵與王仲任同時太伯文術皆其字
莫能詳其始末晉張湛有古今箴銘集十四卷文術
箴銘當必甄錄及之然張本久亡今亦無由攷見矣

處士梁鴻集二卷

鴻始末見史部雜傳記類

范書逸民傳鴻仰慕前世高士而爲四皓以來二十四
人作頌東出關過東師作五噫之歌通吳將行作詩至
吳依大家皋伯通潛閉著書十餘篇思友人高恢作詩
隋書經籍志梁有後漢處士梁鴻集二卷亡唐經籍志
梁鴻集二卷藝文志同

嚴氏文編輯存安止嚴平頌一篇馮氏詩紀輯存五噫
歌適吳詩思友詩三篇

大將軍護軍司馬班固集四十一篇

固始末見經部小學類

范書本傳年九歲能屬文及長博觀載籍九流百家之言無不窮究永平初固始弱冠奏記東平王蒼薦宿儒故司空掾桓梁京兆祭酒晉馮扶風掾李育京兆督郵郭某涼州從事王雍弘農功曹史殷肅蒼納之自爲郎後遂見親近時京師修起宮室濬繕城隍而關中耆老獨望朝廷西顧因感前世相如壽王東方之徒造構文辭終以諷諫乃上兩都賦盛稱洛邑制度之美以折西賓淫佚之論及肅宗雅好文章固愈得幸數入讀書禁中或連日繼夜每行巡狩輒獻上賦頌朝廷有大議使難問公卿辯論於前所著典引賓戲應譏詩賦銘誄頌

書文記論議六言在者凡四十一篇

御覽五百八十八引文章流別傳曰昔班固爲安豐戴侯頌與魯頌體意相類

文心雕龍詮賦篇云孟堅兩都明絢以雅贍又祝盟篇云班固之祀濛山祈禱之誠敬也銘箴篇云若班固燕然之勒序亦盛矣雜文篇云班固賓戲含懿采之華

鍾嶸詩品曰自王揚枚馬之徒詞賦競爽而吟詠靡聞詩人之風頓已缺喪東京二百載中惟有班固詠史質本無文又曰孟堅才流而老於掌故觀其詠史有感歎之詞

隋書經籍志後漢大將軍護軍司馬班固集十七卷唐

日本國人見在書目班固集十二卷唐經籍志班固集
十卷藝文志同

張氏百三家班蘭臺集輯本一卷凡賦表奏記牋書議
符命設難頌銘論哀辭連珠文詩二十九篇

嚴氏文編輯本三卷凡賦頌詩歌疏議箋奏記書論序
連珠銘典引弈旨哀辭祝文凡三十二篇附班超遺文
五篇班勇遺文四篇馮氏詩紀輯存詩歌七篇

長岑長崔駰集二十一篇

駰始末具史部儀制類

范書本傳駰博學有偉才盡通古今訓詁百家之言普
屬文常以典籍爲業未遑仕進之事時人或譏其太玄
靜將以後名失實駰擬揚雄解嘲作達旨以答竇太后

臨朝憲以重戚出納詔命駟獻書誠之憲擅權驕恣駟
數諫之及出擊匈奴道路愈多不法駟前後奏記數十
指切長短所著詩賦銘頌書記表七依婚禮結言達旨
酒警合二十一篇

文心雕龍才略篇曰傳毅崔駟光采比肩又銘箴篇云
崔駟品物讚多戒少雜文篇云崔駟達旨吐典言之裁
又云崔駟七依入博雅之巧

隋書經籍志後漢長岑長崔駟集十卷唐經籍志崔駟
集十卷藝文志同

張氏百三家亭伯集輯本一卷凡賦著述書箋箴銘頌
議論七雜文詩三十五篇

嚴氏文編輯本一卷凡賦諡議奏記箋書達旨博徒論
明帝頌四巡頌七依箴銘婚禮結言凡四十篇馮氏詩
紀輯存安封侯詩

侍中賈逵集九篇

逵始末見經部書類

范書本傳顯宗敕蘭臺給筆札使作神雀頌又作詩頌
誄書連珠酒令凡九篇

隋書經籍志後漢侍中賈逵集一卷梁二卷唐經籍志
賈逵集二卷藝文志同

嚴氏文編賈逵有集二卷今見本傳者有條奏左氏長

義

按當作大義

劉愷傳有賈逵上書書鈔有永平頌文選注

有連珠凡四篇

按續漢書歷志有歷論四篇嚴氏未采失之眉睫

魏郡太守黃香集五篇

范書文苑傳黃香字文彊江夏安陸人也博學經典究精道術能文章京師號曰天下無雙江夏黃童初除郎中元和元年肅宗詔香詣東觀讀所未嘗見書拜尚書郎數陳得失永元四年拜左丞六年累遷尚書令延光元年遷魏郡太守後坐事免數月卒於家所著賦箋奏書令凡五篇

文心雕龍書記篇曰黃香奏箋於江夏亦肅恭之遺式矣

隋書經籍志梁有魏郡太守黃香集二卷亡唐經籍志黃香集二卷藝文志同

嚴氏文編黃香有集二卷今見本傳諸書者有九宮賦
讓東郡太守疏留爲尙書令上疏樂成王萇罪議天子
冠頌屏風銘凡六篇

校書郎劉駒駘集四篇

范書宗室四王三侯列傳初臨邑侯復好學能文章復
于駒駘及從兄平望侯毅並有才學永寧中鄧太后召
毅及駒駘入東觀與謁者僕射劉珍著中興以下名臣
烈士傳駒駘又自造賦頌書論凡四篇亦見文苑劉珍
卷十九引謝承書云劉駒駘除掾陽長吏
民思而歌之云云乃劉陶事非駒駘事也
隋書經籍志後漢校書郎劉駒駘集一卷梁二卷錄一
卷唐經籍志劉駒駘集二卷藝文志同

嚴氏文編劉駒眇有集二卷今見文選注書鈔類聚御覽後漢書注有玄根賦上事諫鑄錢事與竇季瑋書與李子堅書郡太守箴凡五篇

衛尉劉珍集七篇

珍始末具經部小學類

范書文苑傳著誄頌連珠凡七篇

文心雕龍雜文篇曰自揚雄連珠以下擬者閒出杜篤賈逵之曹劉珍潘助之輩欲穿明珠多賈魚目

隋書經籍志後漢劉珍集二卷錄一卷唐經籍志劉珍集二卷藝文志同

嚴氏文編劉珍有集二卷今見袁宏紀者有上言鄧太后宜獻廟一篇見御覽者有東觀漢記光武敘章帝敘

和帝敘殤帝敘四篇

樂安相李尤集二十八篇

尤始末具于部法家類

范書文苑傳尤少以文章顯所著詩賦銘誄頌七歎哀

典凡二十八篇

華陽國志曰明帝召尤

據范書當是和帝

作東觀辟雍德陽諸

觀賦銘懷戎頌百二十銘

御覽五百九十引文章流別傳曰李尤爲銘自山河都

邑至於刀筆竿契無不有銘而文多穢病討論潤色言

可采錄

惠棟後漢書補注李尤集序云尤好爲銘贊門階戶席莫不著述

文心雕龍才略篇曰李尤賦銘志慕鴻裁而才力沈隄

垂翼不飛又銘箴篇云李尤積篇義儉辭碎著龜神物

而居博奕之中衡斛斗量而在杼臼之末曾名品之未暇何事理之能閑哉

隋書經籍志梁又有樂安相李尤集五卷亡宋史藝文志李尤集二卷

張氏百三家蘭臺令李伯仁集輯本一卷凡賦七銘序詩九十三篇

嚴氏文編李尤有集五卷今搜輯羣書有函谷關賦辟雍賦德陽殿賦平樂觀賦東觀賦七款凡六篇又華陽國志稱尤作百二十銘今得八十六銘其餘三十四銘亡編爲一卷馮氏詩紀輯存九曲歌

東觀郎李勝集數十篇

范書文苑李尤傳尤同郡李勝亦有文才爲東觀郎著詩誄頌論數十篇

常璩廣漢人士贊李勝字茂通雒人也爲東觀郎著賦諫論頌數十篇

郎中蘇順集十六篇

范書文苑傳蘇順字孝山京兆霸陵人也和安閒以才學見稱好養生術隱處求道晚迺仕拜郎中卒於官所著賦論誄哀辭雜文凡十六篇

御覽五百九十六引文章流別傳曰哀辭者誄之流也崔瑗馬雄蘇順等爲之率以施於童穉夭折不以壽終者

文心雕龍曰誄碑篇孝山崔瑗辨絜相參觀其序事如傳辭靡律調固誄之才也

隋書經籍志梁又有郎中籍順集二卷錄二卷亡

按籍當是

蘇之刊誤唐經籍志蘇順集二卷藝文志同

嚴氏文編藝文類聚有蘇順歎懷賦和帝誄文選注有陳公誄初學記有賈逵誄凡四篇

處士曹眾集四卷

范書文苑蘇順傳時三輔多士扶風曹眾伯師亦有才學著誄書論四篇

章懷太子曰三輔決錄注曰眾與鄉里蘇孺文寶伯向馬季長並游宦唯眾不遇以壽終於家

惠棟後漢書補注魏文帝典論曰三輔學有俊才茂陵馬季長同郡曹伯師梁葛元甫南陽張平子南郡胡伯始安定胡節等文冠當世也

河間相張衡集三十二篇

衡始末具經部禮類

范書本傳衡少善屬文永元中舉孝廉不行連辟公府不就時天下承平日久自王侯以下莫不踰侈衡乃擬班固兩都作二京賦因以諷諫精思傳會十年乃成順帝初再轉復爲太史令衡不慕當世所居之官輒積年不徙自去史職五載復還乃設客問作應閒以見其志初光武善識顯宗肅宗因祖述焉自中興之後儒者爭學圖緯兼復附以妖言衡以圖緯虛妄非聖人之法乃

上疏請禁絕之及遷侍中常思圖身之事以爲吉凶倚伏幽微難明乃作思玄賦以宣寄情志又欲繼孔子易說彖象殘缺者竟不能就所著詩賦銘七言靈憲應閒七辯巡誥懸圖凡三十二篇

文心雕龍明詩篇曰張衡怨篇情典可味仙詩緩歌雅有新聲又曰四言五言平子得其雅詮賦篇云張衡二京迅發以宏富雜文篇云張衡應閒密而兼雅又曰張衡七辯結采繇靡論說篇云張衡譏世韻似俳說

隋書經籍志後漢河閒相張衡集十一卷梁十二卷又一本十四卷唐經籍志張衡集十卷又總集類二京賦二卷藝文志同宋史志張衡集六卷

張氏百三家張河間集輯本二卷凡賦詒疏策表書七
設難議說銘贊諫樂府詩綜三十八篇

嚴氏文編輯本四卷凡賦東巡詒對策表奏封事疏議
書應閒七辯序贊銘諫及靈憲渾天儀玄圖凡三十八
篇馮氏詩紀輯存怨篇同聲歌定情歌四愁詩思玄詩
凡五篇

濟北相崔瑗集五十七篇

瑗始末具經部小學類

范書崔駰附傳瑗高於文辭尤善爲書記箴銘所著賦
碑銘箴頌七蘇南陽文學官志歎辭移社文悔祈草書
勢七言凡五十七篇

御覽五百九十引文章流別傳曰後世以來器銘之佳

者有王莽鼎銘崔瑗機銘

文心雕龍哀弔篇曰漢武封禪而霍子侯暴亡帝傷而作詩亦哀辭之類也及後漢汝陽王亡崔瑗哀辭始變前式卒章五言頗似歌謠亦彷彿乎漢武也又書記篇曰後漢書記則崔瑗尤善雜文篇云崔瑗七蘇植義純正

隋書經籍志後漢濟北相崔瑗集六卷梁五卷唐經籍志崔瑗集五卷藝文志同唐日本國人見在書目小說家座右銘一卷崔子玉撰

嚴氏文編輯存上言書雜文七蘇南陽文學頌箴銘誄碑草書勢凡二十九篇

黃門郎葛龔集二十篇

范書文苑傳葛龔字元甫梁國寧陵人也。和帝時以詔文記知名。安帝永初中舉孝廉爲大官丞上便宜四事拜蕩陰令辟太尉府病不就。州舉茂才爲臨汾令居二縣皆有稱績。著文賦碑誄書記凡二十篇。

隋書經籍志後漢黃門郎葛龔集六卷梁五卷一本七卷唐經籍志葛龔集五卷藝文志同。

嚴氏文編輯存賦箋書記凡九篇。

按范書本傳不言官黃門郎與隋志所題異。

侍中王逸集二十一篇

逸始末見史部地理類

范書文苑傳著楚辭章句行於世其賦誄書論及雜文。

凡二十一篇

文心雕龍才略篇曰王逸博識有功而絢采無力

隋書經籍志梁有王逸集二卷錄一卷亡唐經籍志王

逸集一卷藝文志同

張氏百三家王叔師集輯本一卷凡賦序論騷詩二十

二篇

嚴氏文編輯本一卷凡機婦賦荔支賦九思折武論并

楚辭章句篇序合三十一篇馮氏詩紀輯存琴思楚歌

一篇

處士王延壽集三卷

范書文苑王逸傳逸子延壽字文考有儒才少游魯國

作靈光殿賦後蔡邕亦造此賦未成及見延壽所爲甚
奇之遂輟翰而已曾有異夢意惡之乃作夢賦以自厲
後溺水死時年二十餘

韋懷太子曰張華博物志云王子山與父叔師到泰山
從鮑子真學算到魯賦靈光殿歸渡湘水溺死文考一

字子山也

惠氏補注水經注曰子山年二十而得惡夢

曰魯作靈光殿初成逸語其子汝寫狀歸吾欲爲賦

文考遂以韻寫簡其父曰此卽爲賦吾固不及矣

文心雕龍詮賦篇曰延壽靈光含飛動之勢才略篇云
延壽繼志環穎獨標其善圖物寫兒豈枚乘之遺術歟
隋書經籍志梁有王延壽集三卷亡

嚴氏文編輯存靈光殿賦王孫賦桐柏淮源廟碑夢賦

凡四篇

廣陵太守張綱集

范書張皓傳皓字叔明

蜀志張翼傳作浩

犍爲武陽人也六世

祖良高帝時爲太子少傅封留侯皓子綱字文紀少明
經學舉孝廉不就司徒辟高第爲御史時順帝委縱宦
官綱上書奏不省漢安元年選遣八使徇行風俗皆耆
儒知名惟綱年少官次最微餘人受命之部而綱獨薶
其車輪於洛陽都亭曰豺狼當路安問狐狸遂奏大將
軍冀河南尹不疑條其無君之心十五事京師震悚時
廣陵賊張嬰等數萬人殺刺史二千石寇亂揚徐閒積
十餘年朝廷不能討冀乃諷尚書以綱爲廣陵太守因

欲以事中之綱單車之職徑造嬰壘以慰安之嬰感悟
乃將所部萬餘人與妻子而縛歸降南州晏然論功當
封梁冀遏絕乃止天子嘉美徵欲擢用綱而嬰等上書
乞留乃許之綱在郡一年年三十六卒

蜀志張翼傳注續漢書曰在郡

二歲建康元年病卒官時年三十六惠棟補注袁宏紀曰年四十六又略本良九世孫傳誤爲六世

華陽國志漢安元年以光祿大夫持節與侍中杜喬循
行州郡考察風俗出宮車先奏太尉桓焉司徒劉壽
尸祿素餐不堪其職出城又奏司隸校尉趙峻河南尹
梁不疑汝南太守梁乾等賊汚濁亂檻車送廷尉治罪
天子以乾梁冀叔父貶秩免峻等又奏魯相寇儀儀自
殺威風大行郡縣莫不肅懼還梁冀恨之出爲廣陵太

守按順帝本紀漢安元年八月丁卯遣侍中杜喬光祿大夫周舉守光祿大夫郭遵馮羨樊豐張綱周栩劉班等八人分行州郡班宣風化舉賢戚不冬十月辛未太尉桓焉司徒劉壽免又曰是歲廣陵賊張嬰等詣太守張綱降
按常璩不言其奏梁冀何也

汪師韓文選理學權輿曰選注所引羣書有張綱集

嚴氏文編輯存上書諫縱宦官上書劾梁冀各一篇

按華陽國志言綱奉使時所奏劾者不止如范書梁

冀梁不疑二事續漢書本傳言綱在廣陵有與張嬰

親信長老書綜其生平所作章疏書記條教及張嬰

上書請留詔書褒美諸文足以編成一集選注引之

汪氏編目列在馮衍桓譚班固盧植之間隋唐志所載皆官庫所有書民

間流傳如是集之類者自羅致不能盡也

大鴻臚竇章集二卷

范書竇融傳融扶風平陵人也玄孫章字伯向少好學有文章與馬融崔瑗同好更相推薦是時學者稱東觀爲老氏臧室道家蓬萊山太僕鄧康遂薦章入東觀爲校書郎順帝初章女選入掖庭與梁皇后並爲貴人擢章羽林郎將遷屯騎校尉貴人卒詔史官樹碑頌德章自爲之辭永和五年遷少府漢安二年轉大鴻臚建康元年梁后稱制章自免卒於家

隋書經籍志梁又有大鴻臚竇章集二卷亡唐經籍志竇章集二卷藝文志同

嚴氏文編輯存移書勸葛襲一篇

司空李固集十一篇

固始末具史部雜傳記類

范書本傳所著章表奏議教令對策記銘凡十一篇

隋書經籍志後漢司空李固集十二卷梁十卷唐經籍

志李固集二卷藝文志十卷

嚴氏文編輯存對策上疏上書議教奏記書敕凡十九

篇

近刻古逸叢書文館詞林殘本中有惟奉高令喪事教一首祀胡毋先生教一首皆永和中爲泰山太守

時作也

徵士崔琦集十五篇

范書文苑傳崔琦字子璋涿郡安平人濟北相瑗之宗也少游學京師以文章博通稱初舉孝廉爲郎河南尹梁冀聞其才請與交冀行多不軌琦數引古今成敗以

戒之冀不能受乃作外戚箴復作白鵠賦以爲風冀因
遭琦歸後除爲臨濟長不敢之職解印綬去冀遂令刺
客陰求殺之客哀其志以實告琦得脫冀後竟捕殺之
所著賦頌銘誄箴弔論九咨七言凡十五篇

隋書經籍志後漢徵士崔琦集一卷梁二卷唐經籍志
崔琦志二卷藝文志同

嚴氏文編崔琦有集一卷今搜輯羣書有七蠲四皓頌
外戚箴三篇琦傳有白鵠賦篇亡

按琦嘗舉孝廉爲郎除臨濟長不知隋志何以題爲
徵士

侍中楊厚集二卷

范書本傳厚字仲桓廣漢新都人也祖父春卿善圖讖
學傳子統厚少學統業精力思述鄧太后除爲中郎免
歸順帝徵拜議郎三遷爲侍中每有災異輒上消救之
法而閹宦專政言不得信固稱病求退歸家修黃老教
授門生上名錄者三千餘人年八十二卒於家鄉人謚
曰文父門人爲立廟郡文學掾史春秋饗射常祠之
華陽國志楊序字仲桓統仲子也道業侔父三司及公
車連徵辟拜侍中上言四方及荆揚交州當兵起人民
疫蝗洛陽大水宮殿當災三府當免近戚謀變皆效驗
唐書藝文志楊厚集二卷

嚴氏文編楊厚華陽國志作楊序今惟厚傳及天文志

注引災異對一篇

按隋志吳人楊厚集二卷梁又有錄一卷唐經籍志二卷並列在吳人中惟藝文志移在漢人劉珍張衡之閒今從之

司徒掾桓麟集二十一篇

范書桓榮傳榮沛郡龍亢人也玄孫彬彬父麟字元鳳早有才惠桓帝初爲議郎入侍講禁中以直道忤左右出爲許令病免會母終麟不勝喪未祥而卒年四十一所著碑誄贊說書凡二十一篇

章懷太子曰按藝文文章志麟文見在者十八篇有碑九首誄七首七說一首沛相郭府君書一首

文心雕龍雜文篇曰自桓麟七說以下左思七諷以上
枝附景從十有餘家或文麗而義賾或理粹而辭駁

隋書經籍志梁有司徒掾桓麟集二卷錄一卷亡唐經
籍志柏麟集二卷藝文志桓麟集二卷

嚴氏文編輯存七說八條大尉劉寬碑一首馮氏詩紀
輯存答客詩一首

按范書附傳不言爲司徒掾或略之也隋志作麟誤
舊唐志以宋本避諱作栢而轉寫譌爲栢麟與麟通
陳相邊韶集十五篇

范書文苑傳邊韶字孝先陳留浚儀人也以文學知名
教授數百人桓帝時爲臨潁侯相徵拜太中大夫著作

東觀再遷北地太守入拜尚書令後爲陳相卒官著詩
頌碑銘書策凡十五篇

隋書經籍志梁有陳相邊韶集一卷錄一卷亡唐經籍
志邊韶集二卷藝文志同

嚴氏文編輯存塞賦上言四分歷之失對嘲河激頌老
子銘凡五篇

益州刺史朱穆集二十篇

范書朱暉傳暉南陽宛人也子頡頏子穆字公叔年五
歲便有孝稱及壯耽學銳意誦誦初舉孝廉順帝末梁
冀辟之使典兵事數奏記以勸戒冀恩高冀爲侍御史
穆常感時澆薄慕尚敦篤乃作崇厚論又著絕交論亦

矯時之作永興元年擢爲冀州刺史徵詣廷尉輸作左
校太學書生劉陶等數千人上書訟穆乃赦之居家數
年徵拜尚書深疾宦官憤惡發疽延熹六年卒時年六
十四公卿共表穆宜旌寵策詔褒述追贈益州太守惠
補注朱公叔鼎銘載詔曰今使卿所著論策奏教書詩
謁者中郎楊貴贈益州刺史印綬記嘲凡二十篇初穆父卒穆與諸儒攷依古義諡曰貞
宣先生及穆卒蔡邕復與門人共述其體行諡爲文忠
先生

范書傳論曰朱穆見比周傷義偏黨毀俗志抑朋游之
私恣著絕交之論蔡邕以爲穆貞而孤又作正交而廣
其志焉

章懷太子曰袁山松書曰穆著論甚美蔡邕嘗至其家
自寫之

惠棟後漢書補注張璠漢記曰邕嘗至穆家寫書及穆
卒邕及門人共謚穆曰忠文朱公叔碑作忠文公一作
忠文子又朱公叔鼎銘曰再拜博士高第作侍御史矯
枉董直同肯阿順以黜其佞潛于郎中羣公並表乃遷
議郎登於東觀纂業前史按穆爲侍御史以不肯阿順
免官復爲郎中及遷議郎與遼詔崔寔曹壽增修漢記
范史皆不載也

隋書經籍志梁有益州刺史朱穆集二卷錄一卷亡唐
經籍志朱穆集二卷藝文志同

嚴氏文編輯存鬱金賦疏奏奏記與劉伯宗絕交書崇厚論絕交論凡十一篇

南郡太守馬融集二十一篇

融始末見經部易類

范書本傳永初時鄧太后臨朝隲兄弟輔政而俗儒世士以爲文德可興武功宜廢遂寢蒐狩之禮息戰陳之法故猾賊縱橫乘此無備融乃感激以爲文武之道聖賢不墜五才之用無或可廢元初二年上廣成頌以諷諫重述蒐狩之義頌奏忤鄧氏滯於東觀十年不得調安帝東巡岱宗上東巡頌帝奇其文善鼓琴好吹笛所著賦頌碑誄書記表奏七言琴歌對策遺令凡二十一篇初融懲於鄧氏不敢復違忤勢家遂爲梁冀草奏李

固又作大將軍西第頌以此頗爲正直所羞

司馬彪續漢書曰融在東觀十年窮覽典籍上廣成頌

陽嘉二年詔舉敦樸徵詣公車融對策於北宮端門

陽嘉

以下三語據
范書校補

御覽五百八十八引文章流別傳曰頌詩之美者也若

馬融廣成上林之屬純爲今賦之體而謂之頌失之遠

矣

文心雕龍才略篇曰馬融鴻儒思洽識高吐納經範華

實相扶又頌讚篇云馬融之廣成上林雅而似賦何弄

文而失質乎雜文篇云馬融七屬植義純正

原作崔暖
七屬文有

脫誤傳云七謨序云馬融作七屬今據以是正又曰唯七屬敘賢歸於儒道雖

文非拔羣而意實卓爾矣

隋書經籍志後漢南郡太守馬融集九卷唐經籍志馬融集五卷藝文志同

張氏百三家馬季長集輯本一卷凡賦疏頌書十二篇而繫以忠經序及經

嚴氏文編輯存琴賦長笛賦鬚髯賦擣搗賦龍虎賦陽嘉二年舉樸敦對策飛章誣李固上疏乞自效上書請赦龐參梁懂延光四年日蝕上書又上書陳星孛奏馬賢事與竇伯尚書與謝伯世書書序廣成頌東巡頌竇大將軍西第頌遺令自敘凡二十篇又曰張溥本有忠經序按忠經及序皆宋人依託不錄

按鄭玄傳云范升陳元李育賈逵之

徒爭論古今學後馬融答北地太守劉瓌及玄答何休
義據通深由是古學遂明則馬氏有答劉瓌論古學書
當在是集
今不可攷

京兆尹延篤集二十篇

篤始末見經部春秋類

范書本傳篤從馬融受業博通經傳及百家之言能著
文章有名京師所著詩論銘書應訊表教令凡二十篇
注訊問也蓋
答客難之類

隋書經籍志後漢京兆尹延篤集一卷梁二卷錄一卷
唐經籍志延篤集二卷藝文志同

嚴氏文編輯存答張奐書與張奐書與高彪書與段紀
明書與劉祐書與李文德書仁孝論凡七篇

五原太守崔寔集十五篇

寔始末見子部法家類

范書崔寔附傳所著碑論箴銘答七言詞文表記書凡十五篇

文心雕龍才略篇曰傅毅崔駰光采比肩瑗寔踵武能世厥風者矣又書記篇崔寔奏記於公府則崇讓之德音矣雜文篇云崔寔客譏整而微質

隋書經籍志梁有五原太守崔寔集二卷錄一卷亡唐日本國人見在書目崔寔集二卷

嚴氏文編輯存大赦賦答譏諫議大夫箴大醫令箴凡四篇

太傅胡廣集二十二篇

廣始末具史部正史類

謝承書曰廣有雅才學究五經古今術藝皆畢覽之

范書本傳廣舉孝廉到京師試以章奏安帝以廣爲天下第一順帝時尙書史敞等薦廣博物洽聞探賾窮理六經典奧舊章憲式無所不覽其所著詩賦銘頌箴弔及諸解詁凡二十二篇

文心雕龍章表篇曰胡廣章奏天下第一當時之傑筆也觀伯始謁陵之章足見其典文之美焉

隋書經籍志梁有後漢太傅胡廣集二卷錄一卷亡唐經籍志胡廣集二卷藝文志同

嚴氏文編輯存上書駁左雄察舉議諫探策立后疏王隆漢官篇解詁敘百官箴敘侍中箴邊都尉箴陵令箴印衣銘綬笥銘徵士法高卿碑弔夷齊文凡十二篇

司農卿皇甫規集二十七篇

范書本傳規字威明安定朝那人也爲郡功曹舉上計掾沖質之間舉賢良方正對策梁冀忿其刺己以規爲下第拜郎中託疾免歸以詩易教授門徒三百餘人積十四年梁冀誅拜太山太守延熹四年冬三公舉規爲中郎將持節監關西兵明年冬徵還拜議郎坐繫廷尉論輸左校赦歸家徵拜度遼將軍永康元年徵爲尙書遷弘農太守封壽成亭侯讓封不受再轉爲護羌校尉熹平三年以疾召還未至卒於穀城年七十一所著賦銘碑讚禱文弔章表教令書檄箋記凡二十七篇

隋書經籍志梁有司農卿皇甫規集五卷亡唐經籍志

皇甫規集五卷藝文志同

張澍二酉堂輯本序曰司農卿皇甫規集五卷七錄隋唐志卷數同本傳言所著凡二十七篇今輯得十一篇而趙壹報書蔡邕薦章並綴諸末

嚴氏文編輯存建康元年對策永康元年對詔求自效疏上疏言羌事上疏自訟上書薦張奐自代上言宜豫黨錮與劉司空箋與馬融書追謝趙壹書女師箴凡十一篇

按本傳規終官護羌校尉其前亦未嘗爲司農卿疑熹平三年以大司農召還范氏以其未上而略之歟上計掾秦嘉集

唐林寶元和姓纂曰後漢上計掾秦嘉集斂下邳皮仲
固撰

嚴氏文編曰秦嘉字士會隴西人桓帝時仕郡舉上計
掾入洛除黃明郎病卒於津鄉亭按續漢郡國志南郡
江陵縣有津鄉當是
其鄉之亭

北堂書鈔藝文類聚太平御覽引秦士會與婦書秦嘉
與妻徐淑書重報妻書各數條

按嘉官黃門郎七錄載其妻徐淑集亦稱嘉爲黃門
郎而林寶云上計掾似其本集原題如此今從之

孝廉酈炎集二卷錄一卷炎始末見經部小學類

范書文苑傳炎有文才解音律言論給捷多服其能理

有志氣作詩二篇

惠棟後漢書補注炎集炎自謂賦頌誄自少爲之又曰
我二十七而作七平矣注云七平蓋七發之類盧植集
載酈文勝誄曰自酈未成童著書十餘箱文體思奧爛
有文章箴縷百家

按惠氏此注據古文苑
章樵注及北堂書鈔

鍾嶸評漢孝廉酈炎詩云文勝託詠靈芝觀懷寄不淺
隋書經籍志梁又有酈炎集二卷錄二卷唐經籍志酈
炎集二卷藝文志同

嚴氏文編輯存對事遺令書二篇馮氏詩紀輯存見志
詩二首

按炎遺令自言爲郡諸曹掾督郵察孝廉爲州從事

祭酒七錄不署其官今從鍾氏詩品題孝廉云

尚書郎桓彬集三篇

范書桓榮傳榮沛郡龍亢人子郁郁中子焉焉兄孫彬字彥林許令麟之子也少與蔡邕齊名初舉孝廉拜尚書郎時中常侍曹節女壻馮方亦爲郎彬厲志操與左丞劉歆右丞杜希同好交善未嘗與方共酒食之會方深怨之遂章言彬等爲酒黨彬遂以廢光和元年卒於家年四十六諸儒莫不傷之所著七說及書凡三篇蔡邕等共論序其志僉以爲彬有過人者四夙智早成岐嶷也學優文麗至通也仕不苟祿絕高也辭隆從儼潔操也乃共樹碑而頌焉

嚴氏文編曰北堂書鈔酒食總篇飯篇膾篇肉篇引桓

彬七說凡四條

大常卿張奐集二十四篇 奐始末具經部書類

范書本傳所著銘頌書教誡述志對策章表二十四篇

隋書經籍志梁有太常卿張奐集二卷錄一卷亡唐經

籍志張奐集二卷藝文志同

張澍二酉堂輯本序曰然明以賢良爲將率卒使薨

伯德服乃威化居各鮮卑失其酋豪非由學該羣籍兼

立志節用能還錄立功閉門守靜乎獨其記難章句不

傳於後弗知仲威之源淵以爲歎息 按奐學尚書於太尉朱龍寵字仲威

見鄧 隋唐志載太常卿集二卷本傳言所著二十四篇

今采輯羣書都爲一卷其子伯英文舒書銘亦附於末

英長子芝字伯英芝弟昶字文舒范書並附見昶傳末

嚴氏文編曰張奐有扶漢賦應詔上書言災應上言東
羌事奏記謝朏與延篤書與陰氏書與宋季文書與
許季師書報崔子玉書與崔子真書與張公超書與孟
季衡書與屯留君書誠兄子書遺命諸子凡十五篇之
有書四篇昶有碑銘一篇

野王令劉梁集二卷錄一卷

范書文苑傳劉梁字曼山一名岑東平寧陽人也梁宗
室子孫而少孤貧賣書於市以自資常疾世多利交以
邪曲相黨乃著破羣論時之覽者以爲仲尼作春秋亂

臣知懼今此論之作俗士豈不媿心其文不存又著辯
和同之論桓帝時舉孝廉除北新城長特召入拜尚書
郎累遷後爲野王令未行光和中平卒

隋書經籍志後漢野王令劉梁集三卷梁二卷錄一卷
唐經籍志劉梁集二卷藝文志同

嚴氏文編輯存告新城縣人教七舉辯和同論三篇附
以劉梁碑

外黃令張升集六十篇

范書文苑傳張升字彥其陳留尉氏人富平侯放之孫
也放湯六代孫少好學多關覽而任情不羈仕郡爲綱紀以
能出守外黃令遇黨錮去官後竟見誅年四十九著賦

誄頌碑書凡六十篇

文心雕龍哀弔篇曰蘇慎張升并述哀文雖發其情華

而未極心實

注慎疑作順

隋書經籍志梁又有外黃令張升集二卷錄一卷亡唐
經籍志張升集二卷藝文志同

嚴氏文編張升有白鳩賦與任彥堅書友論凡三篇其
友論一作反論一作反論語皆誤又或引作張叔皮論
尤誤

外黃令高彪集二卷錄一卷

范書文苑傳高彪字義方吳郡無錫人也家本單寒至
彪爲諸生游太學有雅才後郡舉孝廉試經第一除郎

中校書東觀數奏賦頌奇文因事諷諫靈帝異之時京兆第五永爲督軍御史使督幽州百官大會祖餞於長樂觀議郎蔡邕等皆賦詩彪乃獨作箴邕等甚美其文以爲莫尙也後遷內黃令帝敕同僚臨送祖於上東門詔東觀畫彪像以勸學者彪到官有德政上書薦縣人申屠蟠等病卒於官文章多亡子岱亦知名惠氏補注君碑曰光和七年六月丙申卒又曰碑作外黃傳稱內黃者傳之誤宗按申屠蟠等陳留外黃人亦足證實爲外黃非內黃

隋書經籍志梁有外黃令高彪集二卷錄一卷亡唐經籍志高彪集二卷藝文志同

嚴氏文篇高彪有遺馬季長書督軍御史箴清誠凡三

篇

諫議大夫劉陶集百餘篇

陶始末見經部書類

范書本傳陶著書數十萬言又作七曜論匡老子反韓
非復孟軻及上書言當世便事條教賦奏書記辯疑凡
百餘篇

文心雕龍詠碑篇曰至如崔駰諫趙劉陶誅黃並得憲
章工在簡要

隋書經籍志後漢諫議大夫劉陶集三卷梁二卷錄一

卷唐經籍志劉陶集二卷藝文志劉白集二卷

白是陶之刊誤

嚴氏文編輯存上疏陳事與樂松袁貢連名上疏言張
角疏陳要急八事詣闕上書訟朱穆改鑄大錢議凡五

篇

公車徵士侯瑾集數十篇

瑾始末見史部史鈔類

范書文苑傳瑾作矯世論以譏切當時以莫知於世故作應賓難以自寄餘所作雜文數十篇多亡失

隋書經籍志梁又有侯瑾集二卷亡唐經籍志侯瑾集二卷藝文志同

嚴氏文編輯存箏賦皇德頌敘各一篇

上計趙壹集十六篇

范書文苑傳趙壹字元叔漢陽西縣人也體兒魁梧望之甚偉而恃才倨傲爲鄉黨所擯後屢抵罪幾至死友人救得免壹乃貽書謝恩爲窮鳥賦一篇又作刺世疾

邪賦以舒其怨憤光和元年舉郡上計河南尹羊陟司徒袁逢共稱薦之名動京師士大夫望想其風采及西還州郡爭致禮命十辟公府並不就終於家著賦頌箴誄書論及雜文十六篇

鍾嶸詩品曰元叔散憤蘭蕙指斥囊錢苦言切句良亦勤矣斯人也而有斯困悲夫

文心雕龍才略篇曰趙壹之辭賦意繁而體疏

惠棟後漢書補注文士傳曰壹肩高二尺高自抗竦爲鄉黨所擯今集中有解擯賦

隋書經籍志梁有上計趙壹集二卷錄一卷亡唐經籍志趙壹集二卷藝文志同

嚴氏文編輯存迅風賦解擯賦刺世疾邪賦窮鳥賦報
羊陟書報皇甫規書非草書凡七篇

別部司馬張超集十九篇

范書文苑傳張超字子並河間鄭人也惠氏補注鄭常作鄭留侯

良之後有文才靈帝時從車騎將軍朱儁征黃巾爲別

部司馬著賦頌碑文薦檄箋書謁文嘲凡十九篇超又

善於草書妙絕時人世共傳之

隋書經籍志梁又有別部司馬張超集五卷亡唐經籍

志張邵集五卷藝文志同玉海藝文謂此卽宋史藝文

志張超集三卷

嚴氏文編曰超有集五卷今引見諸書有謂青衣賦與

某公箋與太尉朱雋書尼父頌楊四公頌靈帝河間舊

廬碑凡六篇

九江太守服虔集十餘篇

虔始末見經部春秋類

范書儒林傳虔有雅才善著文論所著賦碑誄書記連珠九憤凡十餘篇

司空荀爽集三卷錄一卷

隋書經籍志後漢司徒荀爽集一卷梁三卷錄一卷唐經籍志荀爽集二卷藝文志同

嚴氏文編輯存延熹九年舉至孝對策陳便宜又奏記讓孝廉又貽李膺書又與郭叔都書又女誠凡五篇

按徐幹中論引荀爽壽夭論又范書朱穆傳注云穆

子野字子遼見荀爽薦文則又有薦朱野文本傳云
司空袁逢舉有道不應及逢卒爽制服三年當世往
往化以爲俗時人多不行妻服雖在親憂猶有弔問
喪疾者又私謚其君父及諸名士爽皆引據大義正
之經典雖不悉變亦頗有改袁山松書亦云蔡邕議
謚朱穆爲文忠先生荀爽聞而非之則又有宜爲舉
主行服宜爲妻行服不宜在親憂弔問不宜爲君父
名士私謚諸論議凡斯之類皆當在是集中也

尙書盧植集六篇

植始末見經部書類

范書本傳植嘗懷濟世志不好辭賦素善蔡邕邕前徙
朔方植獨上書請之所著碑誄表記凡六篇

隋書經籍志梁有盧植集二卷亡唐經籍志盧植集二卷藝文志同

嚴氏文編曰盧植有集二卷今見諸書所引有始立太學石經上書日食上封事奏事獻書規竇武鄺文勝誅凡五篇

左中郎將蔡邕集百四篇

邕始末具經部禮類

范書本傳邕閒居玩古不交當世咸東方朔客難及楊雄班固崔駰之徒設疑以自通乃斟酌羣言韙其是而矯其非作釋誨以自戒厲又曰所著詩賦碑誄銘讚連珠箴弔論議獨斷勸學釋誨敘樂女訓篆勢祝文章表書記凡百四篇傳於世

文心雕龍才略篇曰張衡通瞻蔡邕精雅文史彬彬隔

世相望是則竹柏異心而同貞金玉殊質而皆寶也

說小

家言衡後身即爲蔡邕故劉勰云然

又銘敘篇曰蔡邕銘思獨冠古今橋

公之鉞吐納典謨朱穆之鼎全成碑文溺所長也又誄

碑篇云自後漢以來碑碣雲起才鋒所斷莫高蔡邕觀

楊賜之碑骨鯁訓典陳郭二文詞無擇言周胡眾碑莫

非精允其敘事也該而要其綴采也雅而澤清詞轉而

不窮巧義出而卓立察其爲才自然而至雜文篇云蔡

邕釋誨體奧而文炳

隋書經籍志後漢左中郎將蔡邕集十二卷梁有二十

卷錄一卷唐日本國人見在書目蔡邕集廿卷唐經籍

志蔡邕集二十卷藝文志同崇文總目蔡邕文集五卷
宋史藝文志蔡邕集十卷通志藝文略蔡邕外文一卷
晁氏讀書志蔡中郎集十卷所著文章百四篇今錄止
存九十篇而銘墓居其半或曰碑銘或曰神誥或曰哀
讚其實一也嘗自云爲郭有道碑獨無媿辭則其他可
知已

陳氏書錄解題蔡中郎集十卷唐志二十卷今本缺亡
之外纔六十四篇其間有稱建安年號及爲魏宗廟頌
述者非邕文也卷末有天聖癸亥歐陽靜所書辨證甚
詳以爲好事者雜編他人之文相混非本書

四庫提要曰蔡中郎集六卷此本爲雍正中陳留所刊

文與詩共得九十四首證以張溥百三家集刻本多寡
增損互有出入卷首歐靜序論姜伯淮劉鎮南碑斷非
邕作以年月攷之其說良是張本又載薦董卓表而陳
留本無之其事范書不載或疑爲後人贋作然劉克莊
後村詩話已排詆此表與揚雄劇秦美新同稱則宋本
實有此文後漢諸史自范袁二家以外尙有謝承等諸
家今皆散佚亦難以史所未載斷其事之必無或新本
刻於陳留以桑梓之情欲爲隱諱故削之以滅其蹟歟
嚴可均文編序目曰蔡邕集宋時得殘本重加編次爲
十卷外傳一卷一明初九行仿北宋本一明錫山重刻
本一影寫蘭雪堂活字本一明徐子器六卷本一陳留

六卷本又張溥輯百三家集二卷本

按嚴氏全後漢文編輯本十二卷今

盛行聊城楊氏仿宋本

太尉崔烈集四篇

范書崔寔傳寔從兄烈有重名於北州歷位郡守九卿
靈帝時開鴻都門榜賣官爵烈時因傳母入錢五百萬
得爲司徒於是聲譽衰滅後拜太尉其子鈞爲西河太
守獻帝初鈞與袁紹俱起兵山東董卓以是收烈付郿
獄錮之銀鑰鐵鎖卓旣誅拜烈城門校尉及李傕入長
安爲亂兵所殺烈有文才所著詩書教頌等凡四篇獻帝
本紀初平三年五月董卓部曲將李傕郭汜樊稠張濟
反攻京師六月戊午陷長安城太常种拂太僕魯旭大
鴻臚周奭城門校尉崔烈越騎校尉王願並戰歿吏民
死者萬餘人

惠棟後漢書補注摯虞文章志曰烈字威考駟之孫瑗之兄子自司徒遷太尉封陽平亭侯世系曰駟子盤生烈棟按博陵太守孔彪碑陰有司徒掾博陵崔烈字威攷也

江夏太守韓說集

范書方術傳韓說字叔儒會稽山陰人也博通五經尤善圖緯之學舉孝廉與議郎蔡邕友善數陳災眚及奏賦頌連珠稍遷侍中光和元年十月說言於靈帝云其晦日必食乞百官嚴裝帝從之果如所言中平二年二月又上封事剋期宮中有災至日南宮大火遷說江夏太守公事免年七十卒於家

范書蔡邕傳熹平四年乃與議郎張馴韓說等奏求正
定六經文字又曰邕前在東觀與盧植韓說等撰補後
漢記

續漢書歷志光和三年太常就耽上選侍中韓說等於

太常府議月食術耽以說等議奏聞詔書可按此稱上選侍中或

以侍中選上未報許可之稱

議郎廉品集二卷

隋書經籍志梁又有議郎廉品集二卷亡

嚴氏文編曰廉品爲議郎有集二卷太平御覽五百三

十引廉品大難賦

按魏志杜恕傳有樂安廉昭以才能好言事官尚書

郎似廉氏樂安人昭或品之子弟輩歟

尚書令士孫瑞集二卷

范書王允傳允見卓禍毒方深冀逆已兆密謀共誅之
乃上執金吾士孫瑞爲南陽太守將兵出武關道以討
袁術爲名實欲分路征卓而後拔天子還洛陽卓疑而
留之允乃引內瑞爲僕射又曰士孫瑞字君策扶風人
頗有才謀瑞以允自專討董卓之勞故歸功不侯所以
獲免於難免惟范弼濟陷長安殺王允之難也後爲國三老光祿大夫每
三公缺楊彪皇甫嵩皆讓位於瑞興平二年從駕東歸
爲亂兵所殺獻帝本紀興平二年十一月庚午李傕郭
汜等追乘輿戰於東澗王師敗績殺衛尉
士孫瑞裴松之注魏志獻帝紀
曰時尚書令士孫瑞爲亂兵所害

魏志董卓傳初平三年四月司徒王允尙書僕射士孫
瑞卓將呂布共謀誅卓遂殺卓夷三族裴松之注三輔
決錄注曰瑞字君榮扶風人世爲學問瑞少傳家業博
達無所不通仕歷顯位卓旣誅遷大司農爲國三老每
三公缺瑞嘗在選中天子都許追論瑞功封瑞子萌澹
津亭侯

隋書經籍志梁又有尙書令士孫瑞集二卷亡唐經籍
志士孫瑞集二卷藝文志同

嚴氏文編輯存理王允等事一篇曰蝕行冠禮議一篇

劍銘一篇

或引作博士孫瑞衍博士字
或引作後漢孫瑞妄刪士字

大司農鄭玄集二卷錄一卷

玄始末具經部易類

隋書經籍志梁又有鄭玄集二卷錄一卷亡唐經籍志鄭玄集二卷藝文志同

鄭珍鄭學錄曰鄭玄集唐志二卷按康成平生雜著必皆萃此集中自佚其書而注釋以外文字十不存一惜哉乾隆閒盧氏見曾刻周易鄭注後附康成集其首爲相風賦考此賦藝文類聚卷六十八所載是晉傳玄作不知何以誤歸康成或因名同一時失檢歟

嚴氏文編輯存皇后敬父母議戒子益恩書周易敘尙書大傳敘詩譜敘孝經注敘論語敘自序凡八篇附以六藝論三十八條

按范書本傳言玄答何休論古學書御覽五百八十

八引別傳有嘉禾嘉瓜表頌鄭志載兩答甄子然難
禮凡斯之類皆當在是集中

太常趙岐集

岐始末具史部雜傳記類

范書本傳岐逃難四方北海孫嵩賓石藏岐複壁中數
年岐作尼屯歌二十三章及出擢拜荊州刺史撰次禦
寇論及留荊州自爲壽藏讚頌多所述作

嚴氏文編輯存藍賦與友書遺令敕兄子臨終敕其子
三輔決錄序孟子題辭孟子篇敘凡七篇

泰山太守應劭集四卷

劭始末具史部正史類

隋書經籍志後漢泰山太守應劭集二卷梁四卷唐經
籍志應劭集四卷藝文志同

嚴氏文編輯存貢藥物表奏上刪定律令駁韓卓募兵
鮮卑議鮮卑胡市議追駁尙書陳忠活尹次史王議舊
名諱議營陵令到官移書申約吏民風俗通義序凡八
篇

處士禰衡集二卷錄一卷

衡始末具史部雜傳記類

范書文苑傳衡少有才辨興平中避難荊州建安初來
游許下唯善魯國孔融及弘農楊修劉表及荊州士大
夫服其才名甚賓禮之文章言議非衡不定江夏太守
黃祖亦善待焉衡爲作書記輕重疏密各得體宜祖長
子射爲章陵太守尤善於衡時有獻鸚鵡者射舉卮於
衡曰願先生賦之衡攬筆而作文無加點辭采甚麗其

文章多亡云

文心雕龍才略篇曰禰衡思銳於爲文有偏美焉哀弔篇云禰衡之弔平子縟麗而輕清書記篇云禰衡代書親疏得宜斯又尺牘之偏才也

隋書經籍志梁有後漢處士禰衡集二卷錄一卷亡唐經籍志禰衡集二卷藝文志同

嚴氏文編輯存鸚鵡賦書魯夫子碑顏子碑弔張衡文凡五篇

九江太守邊讓集

范書文苑傳邊讓字文禮陳留浚儀人也少辯博能屬文作章華賦雖多淫麗之辭而終之以正亦相如之諷

也大將軍何進聞讓才名署令史讓善占射能辭對時
賓客滿堂莫不羨其風府掾孔融王朗並修刺候焉議
郎蔡邕深敬之後以高才擢進屢遷出爲九江太守初
平中王室大亂去官歸家恃才氣不屈曹操多輕侮之
言建安中其鄉人有構讓於操操告郡就殺之文多佚
失

魏志武紀注曹瞞傳曰及在兗州陳留
邊讓言議頗侵太祖太祖殺讓族其家

嚴氏文編惟輯存本傳所載章華臺賦并序亦見文選
曹植贈丁儀王粲詩注謝惠連詠牛女詩注

少府孔融集二十五篇

融始末具經部春秋類

范書本傳魏文帝深好融文辭募天下有上融文章者
輒賞以金帛所著詩頌碑文論議六言策文表檄教令

書記凡二十五篇

魏志王粲傳注引文帝典論曰孔融體氣高妙有過人

者然不能持論理不勝辭至於雜以嘲戲及其所善揚

班之儔也

又荀攸傳注引荀氏家傳云濟陰太守祈與孔融論肉刑丞相祭酒愜與孔融論聖人優

劣並在融集

文心雕龍才略篇曰孔融氣盛於爲筆又誄碑篇云後

漢碑碣莫高蔡邕孔融所創有慕伯喈張陳兩文辯給

足采亦其亞也詔策篇云孔融之守北海文教麗而罕

於理乃治體乖也論說篇云孔融孝廉但談嘲戲章表

篇云文舉之薦禰衡氣揚采飛書記篇云文舉屬章牛

簡必錄

隋書經籍志後漢少府孔融集九卷梁十卷錄一卷唐
經籍志孔融集十卷藝文志同

四庫提要曰孔北海集一卷漢孔融撰按魏文帝典論
論文稱孔氏卓卓信含異氣筆墨之性殆不可勝其集
十卷宋史始不著錄此本乃明人所掇拾共三十七篇
張溥百三家亦載是集而較此本少二篇大抵掇拾史
傳類書多斷簡殘章首尾不具不但非隋唐之舊卽蘇
軾孔北海贊序稱讀其所作楊氏四公贊今本亦無之
則宋人所及見者今已不具矣然人旣國器文亦鴻寶
雖缺佚之餘彌可珍也其六言詩見於本傳今所傳三
章詞多凡近又皆盛稱曹操功德斷以融之生平可信

其義不出此卽使舊本有之亦必黃初開購求遺文賡託融作以頌曹操未可定爲真本也

嚴氏文編輯本一卷凡疏議教書論碑銘三十九篇馮氏詩紀輯存詩八首

處士周不疑集四篇

魏志劉表傳注零陵先賢傳曰周不疑字元直幼有異才聰明敏達太祖欲以女妻之不疑不敢當太子愛子倉舒夙有才智謂可與不疑爲儔及倉舒卒太祖心忌不疑欲除之文帝諫以爲不可太祖曰此人非汝所能駕御也乃遣刺客殺之又摯虞文章志曰不疑死時年十七著文論四首

太平御覽五百八十八引零陵先賢傳曰周不疑字文直曹公時有白雀瑞儒林並已作頌不疑見操受紙筆立令復作操奇焉

按魏志武文世王公列傳鄧哀王冲字倉舒建安十三年亡則不疑被殺在是年之後裴注及御覽所引同一書而元直文直其字互異未詳孰是

討虜長史張紘集十餘篇

吳志張紘字子綱廣陵人少游學京都還本郡舉茂才公府辟皆不就避難江東孫策創業遂委質焉表爲正議校尉建安四年策遣紘奉章至許宮留爲侍御史少府孔融等皆與親善策薨曹公表權爲討虜將軍領會

稽太守曹公欲令紘輔權內附出紘爲會稽東部都尉
後權以紘爲長史紘建計宜出都秣陵權從之令還吳
迎家道病卒時年六十著詩賦銘誄十餘篇按吳志權徙治秣陵
城石頭改秣陵爲建業在建安十
六七年紘之卒當在此兩年中

裴松之注吳書曰權初承統每有興事密計及章表書
記與四方交結常令紘與張昭草創撰作又曰紘見柑
榴枕愛其文爲作賦陳琳在北見之以示人曰此吾鄉
里張子綱所作也紘旣好文學又善楷篆書與孔融書
自書融遺紘書曰前勞手筆多篆書每舉筆見字欣然
如復覩其人也

隋書經籍志後漢討虜長史張紘集一卷梁二卷錄一

卷唐書經籍志張紘集一卷藝文志同

嚴氏文編曰張紘有集二卷紘吳志有傳而隋志及類

聚御覽皆列於後漢令從之諸書所引有瓌材枕賦瓌

材枕箴

書鈔引作銘

爲孫會稽責袁術僭號書與孔融書臨

困授子靖留箋凡五篇瓌材枕賦未知卽是柑榴枕賦

否侯攷

按傳注引吳書紘又有與陳琳書今亡

丞相倉曹屬阮瑀集數十篇

魏志王粲附傳陳留阮瑀字元瑜少受學於蔡邕建安

中都護曹洪欲使掌書記瑀終不爲屈太祖以瑀爲司

空軍謀祭酒管記室軍國書檄多瑀所作徙爲倉曹掾

屬著文賦數十篇以建安十七年卒文帝書與元城令

吳質曰元瑜書記翩翩致足樂也

裴松之注曰按魚氏典略摯虞文章志並云瑀建安初辭疾避役不爲曹洪屈得太祖召卽投杖而起又典略載太祖征荊州使瑀作書與劉備及征馬超又使瑀作書與韓遂此二書今具存

按瑀子籍晉書有傳陳留尉氏人也

鍾嶸詩品曰魏倉曹屬阮瑀詩平典不失古體

文心雕龍才略篇曰琳瑀以符檄擅聲又哀弔篇云胡阮之弔夷齊哀而無閒仲宣所制譏呵實工然則胡阮嘉其清王子傷其隘各其志也

胡謂胡廣王爲王粲也

隋書經籍志後漢丞相倉曹屬阮瑀集五卷梁有錄一卷亡唐經籍志阮瑀集五卷藝文志同

張氏百三家阮元瑜集輯本一卷凡賦論書箋文詩十九篇

嚴氏文編輯本有紀征賦止欲賦箏賦鸚鵡賦謝曹公箋爲曹公與孫權書爲曹公與劉備書文質論弔伯夷凡九篇馮氏詩紀輯存樂府詩十篇

魏國郎中令路粹集二卷錄一卷

郎中令疑是祕書令之譌

魏志王粲傳注典略曰路粹字文蔚陳留人少學於蔡邕初平中隨車駕至三輔建安初以高才擢拜尙書郎後爲軍謀祭酒與陳琳阮瑀等典記室及孔融有過太祖使粹爲奏承指數致融罪融誅之後人覩粹所作無不嘉其才而畏其筆也至十九年粹轉爲祕書令從大

軍至漢中坐違禁賤請驅伏法太子素與粹善聞其死

爲之歎息及卽位特用其子爲長史

後漢書孔融傳注亦引之

文心雕龍奏啟篇觀孔光之奏董賢則實其姦回路粹之奏孔融則誣其毀惡名儒之與愴士固殊心焉

隋書經籍志梁有魏國郎中令路粹集二卷錄一卷亡

按隋志此條似有脫誤魏國郎中令五字當屬下文袁渙集之首唐經籍志路粹集二

卷藝文志同

嚴氏文編輯存枉狀奏孔融一篇爲曹公與孔融書一

篇

魏國郎中令行御史大夫袁渙集五卷錄一卷

魏志本傳渙字曜卿陳郡扶樂人也郡命爲功曹後辟

公府舉高第遷侍御史除譙令不就劉備之爲豫州舉
渙茂才後避地江淮閒爲袁術所命頃之呂布擊術於
阜陵渙往從之遂復爲布所拘留布破渙得歸太祖拜
爲沛南部都尉遷梁相以病去官後徵爲諫議大夫丞
相軍祭酒魏國初建此處當以字郎中令行御史大夫事居
官數年卒太祖爲之流涕按魏國初建在建安十八年
魏社稷宗廟冬十月分魏郡爲東西部置都尉十一月
月初置尚書侍中六卿魏氏春秋日以王粲爲侍中
隋書經籍志梁有行御史大夫袁渙集五卷錄一卷亡
按上文魏國郎中令五字唐經籍志袁渙集五卷藝文
當在此集之首轉寫亂之志同

嚴氏文編曰魏志魏書袁紀選注引渙與主簿孫微等

教說曹公與曹子建書凡三篇

魏國奉常王脩集二卷

魏志本傳脩字叔治北海營陵人也初平中北海相孔融召以爲主簿守高密令舉孝廉時天下亂遂不行復署功曹守膠東令袁譚在青州辟爲治中從事袁紹又辟脩除卽墨令紹譚死遂詣太祖乃辟爲司空掾行司金中郎將遷魏郡太守魏國旣建爲大司農郎中令徙奉常病卒官

隋書經籍志梁有魏國奉常王脩集二卷亡唐經籍志王脩集三卷藝文志同

嚴氏文編曰王脩有集二卷通典引脩四孤議一篇魏

略載奏記曹公陳黃白異議一篇類聚御覽引脩誠子書一篇

尚書右丞潘勖集二卷錄一卷

魏志武紀注潘勖字元茂陳留中牟人後漢尚書左丞又衛顗附傳建安末尚書右丞河南潘勖亦與顗以文章顯

裴松之注文章志曰勖字元茂初名芝改名勖或曰勖獻帝時爲尚書郎遷右丞詔以勖前在二千石曹才敏兼通明習舊事敕并領本職數加特賜二十年遷東海相未發留拜尚書左丞其年病卒時年五十餘魏公九錫策命勖所作也

太平御覽五百九十三引殷洪小說曰魏國初建潘勗
爲策命文自漢武以來未有此制勗乃依商周憲章唐
虞辭義溫雅與典誥同風

文心雕龍才略篇曰潘勗憑經以騁才故絕羣於錫命
又銘箴篇云潘勗符節要而失淺

隋書經籍志後漢尙書右丞潘勗集二卷梁有錄一卷
亡唐經籍志潘勗集二卷藝文志同

嚴氏文編輯存玄達賦

一作玄達賦

冊魏公九錫文擬連珠

尙書令荀彧碑凡四篇

魏國侍中王粲集六十篇

梁始末具經部書類

魏志本傳粲善屬文舉筆便成無所改定時人常以爲

宿構然正復精意覃思亦不能加也著詩賦論議垂六十篇文帝書與元城令吳質曰仲宣獨自善於辭賦惜其體弱不起其文至於所善古人無以遠過也

裴松之注典論曰如粲之初征登樓槐賦征思雖張蔡不過也又典略曰粲才既高辯論應機鍾繇王朗等雖各爲魏卿相至於朝廷奏議皆閉筆不能措手

太平御覽五百九十引文章流別傳曰後世器銘之佳者有王莽鼎銘崔瑗機銘朱公叔鼎銘王粲硯銘咸以表顯功德天子銘嘉量諸侯大夫銘太常勒鍾鼎之義所言雖殊而令德一也

王粲硯銘見初學記二十一類聚五十八

鍾嶸詩品曰魏侍中王粲詩其源出於李陵發愀愴之

詞文秀而質羸在曹劉閒別構一體方陳思不足比魏
文有餘

文心雕龍詮賦篇曰仲宣靡密發端必遒雜文篇云仲
宣七釋致辯於事理才略篇云仲宣溢才捷而能密文
多兼善辭少取累摘其詩賦則七子之冠冕乎

隋書經籍志後漢侍中王粲集十一卷唐經籍志王粲
集十卷藝文志同宋史藝文志八卷

鼂氏讀書志曰王粲集八卷粲著詩賦論議垂六十篇
今集有八十一首按唐志粲集十卷今亡兩卷其詩文
反多於史所紀二十餘篇按史所言篇數或以卷分或
以類分晁氏以首數爲篇數
是非

張氏百三家王侍中集輯本一卷凡賦書檄七記論連珠贊銘祭文樂府詩綜五十六篇

嚴氏文編輯本二卷凡賦書檄七釋頌贊論荊州文學官志倣連珠銘弔綜四十六篇馮氏詩紀輯存樂府詩十二篇

按王粲集中有尙書問二卷見唐書元行沖傳晁志稱今亡兩卷者蓋卽尙書問也集中又有贈澹津亭

侯士孫萌詩及萌答詩

萌瑞之子也

見魏志董卓傳注

魏太子文學徐幹集數十篇

幹始末見子部儒家類

魏志王粲附傳著文賦數十篇

裴松之注典論曰今之文人北海徐幹如幹之玄媛漏

卮圓扇橘賦雖張蔡不過也然於他文未能稱是

鍾嶸評魏文學徐幹詩曰偉長與公幹往復雖曰以莛扣鐘亦能閒雅矣

文心雕龍才略篇曰徐幹以賦論標美詮賦篇云偉長博通時逢壯采哀弔篇云建安哀辭惟偉長差善行女一篇時有惻怛

隋書經籍志曰魏太子文學徐幹集五卷梁有錄一卷亡唐經籍志徐幹志五卷藝文志同

嚴氏文編輯本有齊都賦西征賦序征賦哀別賦嘉夢賦冠賦團扇賦車渠椀賦七喻雜文凡十篇馮氏詩紀輯存詩五篇

丞相軍謀掾陳琳集數十篇

魏志王粲附傳廣陵陳琳字孔璋前爲何進主簿後避難冀州袁紹使典文章袁氏敗琳歸太祖太祖謂曰卿昔爲本初移書但可罪狀孤而已惡惡止其身何乃上及父祖耶琳謝罪太祖愛其才而不咎以爲司空軍謀祭酒管記室軍國書檄多琳所作徙門下督著文賦數十篇建安二十二年卒文帝書與元城令吳質曰孔璋章表殊健微爲繁富注又引典論曰琳瑀之章表書記今之儁也

吳志張紘傳注吳書曰紘見陳琳作武庫賦應譏論與琳書深歎美之

文心雕龍檄移篇曰陳琳之檄豫州壯有骨鯁雖姦闇
摘養章密太甚發正摸金誣過其虐然抗辭書賢皦然
露骨矣敢指曹公之鋒幸哉免袁黨之戮也書記篇云
陳琳諫辭稱掩目捕雀引俗說而爲文辭者也

隋書經籍志後漢丞相軍謀掾陳琳集三卷梁十卷錄
一卷唐經籍志陳琳集十卷藝文志同宋藝文志同

陳氏書錄解題曰陳孔璋集十卷魏丞相軍謀掾廣陵

陳琳孔璋撰魏文帝典論以孔融王粲徐幹陳琳阮瑀

應瑒劉楨七人所謂建安七子者也令諸家詩文散見

於文選及諸類書其以集傳者仲宣孔璋而已

按此稱魏丞相

軍謀掾殊誤此丞相
卽曹操也魏當作漢

張氏百三家陳記室集輯本一卷凡賦上書書箋檄版文設難樂府詩二十二篇

嚴氏文編輯本一卷凡大暑賦止欲賦武庫賦神武賦神女賦大荒賦迷迭賦馬瑤勒賦柳賦鸚鵡賦諫何進召外兵答東阿王箋更公孫瓚與子書答張紘書爲曹洪與魏太子書爲袁紹檄豫州檄吳將校部曲文應譏韋端碑凡一十九篇馮氏詩紀輯存樂府詩三篇

魏太子文學應瑒集數十篇

瑒始末具子部雜藝術類

魏志王粲附傳瑒著文賦數十篇建安二十二年卒文帝書與吳質曰德琰常斐然有述作意其才學足以著書美志不遂良可痛惜注又引典論曰應瑒和而不壯

劉楨壯而不密

文心雕龍才略篇曰應瑒學優以得文又序志篇云詳觀近代之論文者若應瑒文論華而疏略

隋書經籍志魏太子文學應瑒集一卷梁有五卷錄一卷亡唐經籍志應瑒集二卷藝文志同

張氏百三家應德璉集輯本一卷凡賦書論雜文詩二十篇

嚴氏文編輯本有愁霖賦靈河賦正情賦撰征賦西征賦西狩賦馳射賦校獵賦神女賦車渠碗賦竦迷迭賦楊柳賦鸚鵡賦繁驥賦報龐惠恭書釋賓文質論奕勢凡一十八篇馮氏詩紀輯存詩五篇

魏太子文學劉楨集數十篇

楨始末見經部詩類

魏志王粲附傳楨著文賦數十篇

裴松之注魏略曰建安二十三年太子又與吳質書曰
孔璋章表殊健微爲繁富公幹有逸氣但未遒耳至其
五言詩妙絕當時

鍾嶸詩品曰魏文學劉楨詩其源出於古詩仗氣愛奇
動多振絕眞骨凌霜高風跨俗但氣過其文雕潤恨少
然自陳思以下楨稱獨步

文心雕龍才略篇曰劉楨情高以會采書記篇云公幹
箋記麗而規益子桓弗論故世所共遺若略取名實則
有美於爲詩矣

隋書經籍志魏太子文學劉楨集四卷錄一卷唐經籍志劉楨集二卷藝文志同

張氏百三家劉公幹集輯本一卷凡賦書碑詩十七篇嚴氏文編輯本有大暑賦黎陽山賦魯都賦遂志賦清慮賦瓜賦與曹植書諫曹植書答魏太子丕借廓落帶書處士國文甫碑凡十篇馮氏詩紀輯存詩八篇

丞相主簿繁欽集十卷錄一卷

魏志王粲附傳潁川繁欽亦有文采

裴松之注繁音婆典略曰欽字休伯以文才機辯少得名於汝潁欽長於書記又善爲詩賦其所與太子書記喉轉意率皆巧麗爲丞相主簿建安二十三年卒

文選繁休伯與魏文帝箋注文章志曰繁欽字休伯潁川人少以文辨知名以豫州從事稍遷至丞相主簿病卒文帝集序云上西征余守譙繁欽從時辟訪車子能喉轉與笳同音欽箋還與余而盛歎之雖過其實而其文甚麗

隋書經籍志後漢丞相主簿繁欽集十卷梁錄一卷亡唐經籍志繁欽集十卷藝文志同

嚴氏文編輯本有暑賦抑檢賦明賦愁思賦一作秋思弭

愁賦述征賦述行賦一作避地賦征天山賦一作撰建

章鳳闕賦三胡賦桑賦柳賦與魏太子箋爲史叔良作

移零陵檄川里先生訓硯頌硯讚尙書箴威儀箴嘲應

德璉文正雋碑凡二十二篇馮氏詩紀輯存詩六篇

丞相主簿楊脩集十五篇

脩始末見子部雜藝術類

范書楊震附傳脩所著賦頌碑讚詩哀辭表記書凡十五篇

文心雕龍才略篇曰路粹楊脩頗懷筆記之工

隋書經籍志後漢丞相主簿楊脩集一卷梁二卷錄一卷唐經籍志楊脩集二卷藝文志同

嚴氏文編輯存節游賦出征賦許昌宮賦神女賦孔雀賦答臨淄侯箋司空荀爽述贊凡七篇

尚書丁儀集二卷錄一卷

黃門郎丁廙集二卷錄一卷

魏志王粲附傳自潁川邯鄲繁欽陳留路粹沛國丁

儀丁廙弘農楊脩河內荀緯等皆有文采而不在此七

人之例

謂此亦七人而不在文帝所論建安七子之列例似列之寫誤七子者孔融陳琳王粲徐幹

阮瑀應瑒劉楨也邯鄲淳荀緯兩人卒於魏世故其集編入三國藝文志

魏志陳思王植傳植既以才見異而丁儀丁廙楊脩等

爲之羽翼太祖狐疑幾爲太子者數矣及植寵日衰太

祖既慮終始之變以楊脩頗有才策而又袁氏之甥於

是以罪誅脩文帝卽王位誅丁儀丁廙并其男口

裴松之注魏略曰丁儀字正禮沛郡人也父冲宿與太

祖稱善太祖嘗德之聞儀爲令尹辟爲掾與臨淄侯親

善數稱其奇才太祖既有意欲立植而儀又共贊之及

太子立欲治儀罪轉儀爲右刺姦掾欲儀自裁而儀不能乃對中領軍夏侯尚叩頭求哀尚爲涕泣而不能救後遂因職事收付獄殺之廙字敬禮儀之弟也文士傳曰廙少有姿才博學洽聞初辟公府建安中爲黃門侍郎

馮氏詩紀引文士傳作丁冀

文心雕龍才略篇曰丁儀邯鄲亦含論述之美

隋書經籍志後漢尙書丁儀集一卷梁二卷錄一卷又曰後漢黃門郎丁廙集一卷梁二卷錄一卷唐經籍志丁儀集二卷丁廙集二卷藝文志同

嚴氏文編輯存丁儀厲志賦周成漢昭論刑禮論凡三

篇

魏志劉廙傳廙與丁儀共論刑禮傳於世

丁廙蔡伯喈女賦彈碁賦二篇

扶風太守傅幹集

范書傳變傳變字南容北地靈州人也靈帝時爲漢陽太守賊圍漢陽變固守子幹年十三從在官舍變呼幹小字曰別成吾必死於此汝有才智勉之變臨陣戰歿幹知名位至扶風太守章懷太子注曰幹集曰幹字彥林靈帝本紀中平四年夏四月金城賊韓遂寇漢陽漢陽太守傅變戰歿

魏志武紀建安十九年注九州春秋曰參軍傅幹字彥材北地人終於丞相倉曹屬有子曰玄

嚴氏文編曰九州春秋引幹諫曹公南征藝文類聚引幹肉刑議王命敘皇后箴初學記御覽引幹與張叔威書綜凡五篇

按章懷注傅燮傳引幹集云云則幹有集審矣九州
春秋言終於丞相倉曹屬則卒於建安時晉書傳玄
傳云父幹魏扶風太守則嘗仕於魏今從司馬彪言
錄之於末簡嚴鐵橋先生編後漢文亦列之漢末

曹大家集十六篇

曹大家見史部雜傳記類

范書列女傳每有貢獻異物輒詔大家作賦頌又曰所
著賦頌銘誄問注哀辭書論上疏遺令凡十六篇子婦
丁氏爲撰集之又作大家讚焉

隋書經籍志梁有班昭集三卷亡唐經籍志曹大家集
二卷藝文志同

嚴氏文編輯本有東征賦鍼縷賦大雀賦蟬賦爲兄超

求代疏上鄧太后疏歆器頌女誠凡八篇

黃門郎秦嘉妻徐淑集一卷

秦嘉別有集見前

嚴氏文編曰徐淑隴西人黃門郎秦嘉妻有集一卷御覽四百四十一引杜預女記淑喪夫守寡兄弟將嫁之誓而不許史通云徐氏毀形不嫁哀慟傷生通典六十九晉咸平五年散騎侍郎駕嶠妻于氏上表云漢代秦嘉早亡其妻徐淑乞子而養之淑亡後子還所生朝廷通儒移其鄉邑錄淑所養子還繼秦氏之祀又曰書鈔類聚御覽有徐淑答夫秦嘉書又報嘉書三條又爲誓書與兄弟

鍾嶸詩品曰漢上計秦嘉妻徐淑詩夫妻事既可傷文

亦悽怨爲五言者不過數家而婦人居二徐淑敍別之作亞於團扇矣

隋書經籍志梁又有婦人後漢黃門郎秦嘉妻徐淑集一卷亡

馬芝申情賦一篇

范書列女傳汝南袁隗妻者扶風馬融之女也字倫隗既寵貴當時倫亦有名於世倫妹芝亦有才義少傷喪親長而追感乃作申情賦云

蔡文姬集一卷

蔡文姬見經部樂類

范書列女傳陳留董祀妻者同郡蔡邕之女也祀爲屯田都尉犯法當死文姬詣曹操請之乃追原祀罪操因

問曰聞夫人家先多墳籍猶能憶識之不文姬曰昔亡父賜書四千許卷流離塗炭罔有存者今所誦憶裁四百餘篇耳操曰今當使十吏就夫人寫之文姬曰妾聞男女之別禮不親授乞給紙筆真草唯命於是繕寫送之文無遺誤後感傷亂離追懷怨憤作詩二章

隋書經籍志梁又有後漢董祀妻蔡文姬集一卷亡

傅石甫妻孔氏集一卷

隋書經籍志梁又有傅石甫妻孔氏集一卷亡

右別集類凡九十三家九十三部

張氏百三家集錄荀悅漢紀中鑒中序論爲荀侍中

集一卷張氏二酉堂叢書錄范書段熲傳所載奏疏爲段太尉集一卷皆前史所無今並不錄史傳所載諸文或據名臣奏或據臺閣政事或采自家傳別傳及附傳他詩文集未必各有其集凡此之類今並從略焉

連珠集

太平御覽五百九十引傅玄敘連珠云連珠者班固賈逵傅毅三才子受詔作之同喻美辭壯文體宏麗最得其體賈逵儒而不豔傅毅文而不典

按傅玄敘連珠所言則三人承詔合作而奏御者當時別有此一編可知也

永平神雀頌五篇

范書賈逵傳永平中有神雀集宮殿官府冠羽有五采色

玉海卷六十引東觀記云永平十四年范書本紀在十七年

帝異之以問臨邑侯

劉復復不能對薦逵博物多識帝乃召見逵問之對曰昔武王終父之業驚鷺在岐宣帝威懷戎狄神雀仍集

此胡降之徵也帝敕蘭臺給筆札使作神雀頌

論衡佚文編永平中神雀羣集孝明詔上神雀頌百官
上頌文比瓦石惟班固賈逵傅毅楊終侯諷五頌金玉
孝明覽焉

鴻都篇賦

范書蔡邕傳初帝好學自造皇義篇五十章因引諸生
能爲文賦者本頗以經學相招後諸爲尺牘及工書鳥
篆者皆加引召遂至數十人侍中祭酒樂松賈護多引
無行趣勢之徒並待制鴻都門下熹陳方俗閭里小事
帝甚悅之待以不次之位光和元年遂至鴻都門學畫
孔子及七十二弟子像其諸生皆敕州郡三公舉用辟

召或出爲刺史太守人爲尙書侍中乃有封侯賜爵者
士君子皆恥與爲列焉

邕上封事曰夫書畫辭賦才之小者匡國理政未有其
能陛下卽位之初先涉經典聽政餘日觀省篇章聊以
游意當代博弈非以教化取士之本而諸生競利作者
鼎沸其高者頗引經訓風喻之言下則連偶俗語有類
俳優或竊成文虛冒名氏臣每受詔於盛化門差次錄
第其未及者亦復隨輩皆見拜擢旣加之恩難復收改
但守奉祿於義已弘不可復使理人及仕州郡又對特
詔問曰尙方工技之作鴻都篇賦之文可且消息

按范書酷吏傳陽球拜尙書奏罷鴻都文學曰伏承

有詔中尙方爲鴻都文學樂松江覽等三十二人圖像立贊以勸學者云云則鴻都篇賦之文大抵皆此三十二人所作爲多蔡邕嘗承詔數於盛化門差次錄第之

曹大家幽通賦注一卷

漢書敘傳曰有子曰固弱冠而孤作幽通之賦以致命遂志劉德曰致極也陳吉凶性命遂明已之志李善文選注曰幽通謂與神遇也

唐書經籍志幽通賦一卷班固撰曹大家注藝文志曹大家注班固幽通賦一卷

嚴氏文編曰北堂書鈔一百二十二引班固幽通賦序

漢書敘傳文選及藝文類聚二十六並載其文

按范書列女傳載大家所著十六篇中有問及注兩種今問不可攷注卽是書及列女傳之類疑此一卷是本集佚存本李善注文選似卽據其本而補益之
蔡邕典引篇注一卷

李善文選注蔡邕曰典引者篇名也典者常也法也引者伸也長也尙書疏堯之常法謂之堯典漢紹其緒伸而長之也

隋書經籍志梁有班固典引一卷蔡邕注亡

按蔡氏注典引今見文選第四十八卷中隋志云亡者但據七錄單行本言之

無名氏注思玄賦一卷

李善文選注張平子名衡和帝時爲侍中順和二帝之

時按此稱和帝順和二帝皆誤當云順帝及安順二帝國政稍微專恣內豎平子

欲言政事又爲奄豎所讒蔽意不得志欲游六合之外
勢旣不能義又不可但思其玄遠之道而賦之以申其
志耳又曰思玄賦舊注未詳注者姓名摯虞流別題曰
衡注詳其義訓甚多疏略而注又稱愚以爲疑非衡明
矣但行來旣久故不去

汪師韓文選理學權輿曰思玄賦舊注文章流別集以
爲平子自注李氏辨其非

按此舊注遠在摯虞仲治之前或當漢時所有今姑

錄之於末簡

右總集類凡六家六部

按隋經籍志以詩文家之解釋評論者附之總集篇
今用其例前三家總集之屬後三家解釋之屬也若
評論則未有其書故亦不具

附錄二種

四十二章經一卷

永平十年丁卯於白馬寺與法蘭共譯初
出舊錄云孝明皇帝四十二章經其本見

在第一譯別錄云後漢天竺沙門迦葉摩騰
共竺法蘭譯凡此所注皆開元釋教錄下並同

梁會稽嘉祥寺沙門慧皎高僧傳攝摩騰本中天竺人

善風儀解大小乘經常游化爲任漢永平中至維邑邯
帝甚加賞接於城西門外立精舍以處之漢地有沙門

之始也後卒於雒陽有記云騰譯四十二章經一卷初
緘在蘭臺石室第十四間中騰所住處今雒陽城西雍
門外白馬寺是也

唐西京崇福寺沙門智昇開元釋教錄沙門迦葉摩騰
或云竺葉摩騰亦云攝摩騰印度人幼而聰敏博學多
聞思力精拔特明經律明帝以永平七年夢見金人身
長丈六項佩日輪光明赫奕飛在殿前明旦博問羣臣
通人傅毅進曰臣聞西域有得道者號之曰佛陛下所
夢得毋是乎帝以爲然詔遣郎中蔡愔郎將秦景博士
弟子王遵等一十八人往天竺尋訪佛法於大月支國
與摩騰相遇遂與同來明帝甚加賞接所將佛經及畫

像狀以白馬因起伽藍名白馬寺出四十二章經初緘
蘭臺石室第十四閒內卽是漢地經法之祖也舊錄云
此經本是外國經鈔元出大部撮要引俗似孝經騰以
大化初傳人未深信蘊其妙解不卽多翻且撮經要以
導時俗騰後終於洛陽

隋書經籍志曰推尋典籍自漢以上中國未傳或云久
以流布遭秦之世所以堙滅其後張騫使西域蓋聞有
浮屠之教哀帝時博士弟子秦景使伊存口授浮屠經
中土聞之未之信也後漢明帝遣郎中蔡愔及秦景使
天竺得佛經四十二章又曰其經緘於蘭臺石室

按慧皎高僧傳云四十二章經可二千餘言也漢地

諸經惟此爲始牟子理惑論云於是遣羽林將軍奉
景等十二人之大月氏國寫取佛經四十二部在蘭
臺石室袁宏後漢紀云有經書數千卷法苑珠林感
應錄引漢明帝內記云鈔聖教六十萬五千言以白
馬馱還是其來也實有四十二部此四十二章者摩
騰等以華言述其大要耳亦見文獻通攷今亦有刊
入叢書者

十地斷結經八卷

或四卷亦云十住初出與竺佛念十住斷結經同本永平十三年出見朱士行漢錄

及高僧傳長房錄等

別錄云後漢天竺三藏竺法蘭于白馬寺譯第一譯地之與住其義大同

法海藏經一卷

一本無藏字初出與法海經等同本見高僧傳及長房錄等別錄云第一譯

佛本行經五卷

永平十一年出見高僧傳及長房錄等別錄云小乘經單譯缺本

佛本生經一卷

見高僧傳及長房錄等單譯缺本

右四部一十五卷其本並缺別錄云小乘經

慧皎高僧傳竺法蘭中天竺人自言誦經論數萬章爲天竺學者之師時蔡愔旣至彼國蘭與摩騰共契游化遂相隨而來旣達雒陽與騰同止少時便善漢言愔於西域獲經卽爲翻譯所謂十地斷結佛本生法海藏佛本行四十二章等五部移都寇亂四部失本不傳蘭後卒於雒陽春秋六十餘矣

開元釋教錄沙門竺法蘭中印度人旣達洛陽與摩騰共譯四十二章經騰卒蘭自譯十地斷結經等四部

隋書經籍志曰永平中竺法蘭又譯十住經其餘傳譯多未能通章帝時楚王英以崇敬佛法聞西域沙門齋

佛經而至者甚眾

道行般若波羅蜜經十卷

題云摩訶般若波羅蜜道行經亦云般若道行品經或八卷初出與

明度小品及大般若第四會同本光初二年七月八日出見敬祐二錄別錄云後漢月支三藏支婁迦識譯

無量清淨平等覺經二卷

亦直云無量清淨經第二出與大阿彌陀及寶積無量壽會等並同

本見吳錄別

錄云第二譯

阿閼佛國經二卷

建和元年譯或一卷初出與寶積不動如來會等同本見朱士行漢錄及僧祐錄亦

云阿閼佛刹諸菩薩學成此經或無國字別錄云第一譯

佛遺日摩尼寶經一卷

安公云出方等部初出與寶積普明菩薩會等同本一名古品遺日說般

若一名大寶積經一名摩訶衍寶嚴經見僧祐長房二錄別錄云第一譯

兜沙經一卷

見僧祐錄及吳錄是華嚴名號品異譯

般舟三昧經三卷

一名十方現在佛悉在前立定經舊錄云大般舟三昧經或一卷光初二年譯初出

與大集賢護經等同本見聶道真錄
及吳錄別錄云或二卷第一譯

他真陀羅所問經二卷
初云他真陀羅所問寶如來三昧經
舊錄云他真陀羅尼王經或三卷初

出與大樹緊那羅經同
本安錄無見朱
士行漢錄及僧祐錄別錄云第一譯

阿闍世王經二卷
初出與普超三昧經等同本見僧祐錄安
公云出長阿舍者非也別錄云第一譯

內藏百寶經一卷
亦云內藏百品初出與世高譯者小異安
公云出方等部見僧祐錄別錄云第一

譯

文殊師利問菩薩署經一卷
亦直云問署經見僧祐錄及吳
錄安公云出方等經

雜譬喻經一卷
凡十一事祐云失譯房云見別
錄以上十一部二十六卷見在

大方等大集經二十七卷
初出與曇無讖等出者同本
見李廓錄別錄云第一譯

般舟三昧經一卷
是後十品重翻祐有此一卷無三卷者見
靜泰錄或加大字第三出祐錄云光和二

年十月八日出
別錄云第三譯

梵般泥洹經二卷

或一卷初出與大涅槃經等同本見朱士行漢錄及僧祐錄舊云胡般新改爲梵

別錄云第一譯

象液經一卷

初出見法上錄 別錄云第一譯

諸法勇王經一卷

初出見法上錄 別錄云第一譯

光明三昧經一卷

初出祐云出別錄安隊無房云亦見吳錄 別錄云第一譯

李本經二經

初出見僧祐錄 別錄云第一譯

首楞嚴經二卷

中平三年二月八日出第一譯又云三卷見朱土行漢錄及僧祐錄吳錄

大方便報恩經一卷

見吳錄

阿閼世王問五逆經一卷

亦云阿閼世王經初出見長房錄 別錄云第一譯

禪經一卷

初出房云見別錄 別錄云第一譯

阿育王太子壞目因緣經一卷

佛涅槃後一百餘年育王方出故非佛說或無經字初出

見長房錄 別錄云第一譯 以上一十二部四十一卷缺
本

慧皎高僧傳支婁迦讖亦直云支讖本月支人操行純
深性度開敏稟持法戒以精勤著稱諷誦羣經志在宣
法漢靈帝時游於雒陽以光和中平之間傳譯梵文出
般若道行般若舟首楞嚴等三經又有阿闍世王寶積等
十餘部經歲久無錄安公校定古今精尋文體云似讖
所出凡此諸經皆審得本旨了不加飾可謂善宣法要
宏道之士也後不知所終

開元釋教錄沙門支婁迦讖亦云支讖月支國人桓靈
之代游於洛陽從桓帝建和元年丁亥至靈帝中平三
年景寅唐諱丙故曰景於洛陽譯道行等經二十三部審得本

旨曾不加飾河南清信士孟福張蓮筆受

隋書經籍志曰靈帝時有月支沙門支讖天竺沙門竺佛朔等並翻佛經而支讖所譯泥洹經二卷學者以爲

大得本旨

大乘方等要慧經一卷

初出與寶積彌勒問入法會同本見長房錄別錄云後漢安息三藏安

世高譯第一譯

太子慕魂經一卷

初出出六度集中異譯見長房錄別錄云太子慕魂經或作沐魂第一譯

長者子制經一卷

一名制經初出與逝童子經同本見長房錄別錄云第四譯按當是第一譯

寶積三昧文殊問法身經一卷

一名遺口寶積三昧文殊師利菩薩問法身經初出與入

法界體性經同本見房錄別錄云第一譯

自誓三昧經一卷

題下注云屬證品第四出比正淨行中初出與法護出者大同小異見長房錄別

錄云第一譯

溫室洗浴眾僧經一卷

亦直云溫室經初出見長房錄別錄云第一譯

明度五十校計經一卷

或直云明度校計亦云五十校計元嘉元年出見朱士行漢錄

佛印三昧經一卷

見長房錄

八大人覺經一卷

見寶唱錄

舍利佛悔過經一卷

亦直云悔過經初出見長房錄別錄云第一譯

人本欲生經一卷

元嘉二年出長阿含第十卷異譯道安注解見朱士行漢錄及僧祐錄

尸迦羅越錄向拜經一卷

或云尸迦羅越六方禮經出長阿含第十一卷異譯見長房錄別

錄云中阿含卅卷中亦有此經

長阿含十報法經二卷

一名多增道章經或直云十報經出長阿含第九卷異譯舊錄亦云出長

阿含見僧祐錄

一切流攝守因經一卷

出中阿含第二卷異譯舊錄云一切流攝經吳錄云流攝守因經亦云受

因亦直云流攝亦云一切流攝守見朱士行及僧祐二錄

四諦經一卷

出中阿含第七卷異譯見僧祐錄安公云出長阿含者或誤也

本相倚致經一卷

出中阿含第十卷異譯吳錄云大相倚致與緣本致經同本或作倚字見漢錄

是法非法經一卷

出中阿含第二十一卷異譯見士行僧祐二錄

漏分布經一卷

出中阿含第二十七卷異譯見士行僧祐二錄安公云出長阿含者或誤也

婆羅門子命中愛念不離經一卷

出中阿含第六十卷異譯見長房錄

十支居士入城人經一卷

出中阿含經第六十卷異譯見長房錄別錄云亦云十支經

普法義經一卷

亦名普義經一名具法行經出中阿含元嘉二年出與廣義法門經同本見士行僧祐二錄

錄別錄云第一譯

婆羅門避死經一卷

出增一阿含第二十三卷異譯見長房錄別錄云出增一阿含增上品

阿那那化七子經一卷出增一阿舍第四十九卷異譯

阿難同學經一卷題云出增一阿舍檢無見長房

七處三觀經一卷出雜阿舍中或二卷元嘉

五陰譬喻經一卷或無譬字一名水沫所漂經出雜阿

轉法輪經一卷或云法輪轉經出雜阿舍第十五卷

入正道經一卷出雜阿舍第二十八卷

摩鄧女經一卷或云摩鄧女一名阿難為蠱道女惑經見長

譯一

鬼問目蓮經一卷初出與餓鬼報應經等同本

阿難問事佛吉凶經一卷或云阿難問事經亦云事佛吉凶

等同本
錄云第一譯別

奈女祇城因緣經一卷初出或無因緣字亦云奈女經見長房錄別錄作者城云第一譯

罪業報應教化地獄經一卷初出或云地獄報應經見長房錄別錄云第一譯

堅意經一卷初出一名堅心正意經亦名堅心見長房錄別錄云第一譯

大安般守意經二卷或一卷或無守意字或直云安般經安公云小安般兼注解見士行僧祐李廓

三錄

陰持入經二卷或一卷或注云除持入誤也亦云住陰持入安公注解見士行僧祐二錄

處處經一卷見長房錄

罵意經一卷見長房錄

分別善惡所起經一卷見長房錄

出家緣經一卷一名出家因緣經見長房錄

阿鈴正行經一卷一名正意經見長房錄

十八泥犁經一卷或云十八地獄經見長房錄

法受塵經一卷見僧祐錄

禪行法想經一卷見僧祐錄寶唱錄

長者子懊惱三處經一卷一名長者懊惱三處經亦直云三處惱經見長房錄

憍陀國王經一卷或無國字見長房錄

父母恩難報經一卷亦云難報見長房錄房云出中阿含檢無

九橫經一卷或云出維阿含檢無見長房錄

禪行三十七經一卷或加品字見寶唱錄

犯戒報應輕重經一卷出口連問毘尼經亦云犯戒罪報輕重或云目連問經見長房錄

大比丘三千威儀經二卷或四卷亦云大僧威儀經房云見別錄

道地經一卷初出或加大字是修行經鈔元外國略本道安注解見僧祐錄羣錄並云二卷準安公序云凡

有七章此之一卷文亦備矣別錄云第二譯安法師序云沙門眾護撰述經要以爲一部二十七章世高析護所集者七章以爲漢文

迦葉結經一卷初出見長房錄別錄云第一譯

阿毘曇五法行經一卷或無行字亦云阿毘曇苦慧經見僧祐錄以上五十四部五十九卷見存

無量壽經二卷初出與寶積無量壽會等同本房云見別錄別錄云第一譯

如幻三昧經二卷或一卷初出與寶積善住意會等同本房云見別錄別錄云第一譯

月燈三昧經一卷出大月錄經第七異譯見長房錄別錄云第一別譯

十二因緣經一卷初出亦云問城十二因緣經見僧祐錄別錄云第一譯

內藏經一卷第二出一名內藏百品或云百寶元嘉二年十月出見朱士行漢錄別錄云第二譯

四不可得經一卷初出或無可字見長房錄

藥王藥上菩薩觀經一卷

初出見長房錄

別錄云第一譯

空淨天感應三昧經一卷

舊錄云空淨三昧經初出見長房錄別錄云第一譯

卒逢賊結衣帶咒經一卷

見長房錄

呪賊經一卷

一名辟除賊害呪見長房錄

十四意經一卷

舊錄云菩薩十四意經見僧祐錄

法律三昧經一卷

初出見法上錄

別錄云第一譯

道意發行經二卷

或一卷見道安及僧祐錄房云出長阿含

大十二門經二卷

或一卷出長阿含安公注見寶唱及僧祐錄

小十二門經一卷

出長阿含安公注見寶唱及僧祐錄

七法經一卷

舊錄云阿毘曇七法行經或直云七法行經見僧祐錄房云出長阿含

多增道章經一卷

舊錄無道字云異出十報法見長房錄云出長阿含

義決律經一卷

或無經字亦云義決律法行經安公云出長阿含

維四十四篇經二卷

或云雜經四十四篇既不顯名未知何經安公云出增一阿含見僧祐錄

百六十品經一卷

舊錄云出增一阿含百六十章經見僧祐錄

舍頭諫經一卷

見舊錄第二出亦云舍頭諫太子明二十八宿經亦云虎耳經別錄云第二譯

瑠璃王經一卷

或云流離房云出增一檢無見長房錄別錄云第二譯

太子夢經一卷

初出見長房錄別錄云第一譯

禪經二卷

第二出房云見別錄別錄云第二譯

恆水經一卷

利出亦云恆水不說戒經見法上錄寶唱錄恆水識經別錄云第一譯

悔過法經一卷

見長房錄別錄云小乘經單譯缺本

五法經一卷

見僧祐錄別錄云小乘經單譯缺本

五行經一卷

見長房錄別錄云小乘經單譯缺本

小般泥洹經一卷房云見別錄云或名泥洹後變記經或云

經或云佛般泥洹後比世變

正齋經一卷見長房錄別

分明罪福經一卷見長房錄別

難提迦羅越經一卷見僧祐錄別

禪定方便次第法經一卷見長房錄別

禪法經一卷見長房錄別

常來變滅經一卷見長房錄別

修行道地經一卷或六卷初出或云順道行經漢永康元年

云第一譯

五門禪要用法經一卷初出見長房錄別錄云第一譯

思惟要略經一卷

或直云思惟經初出見僧祐錄別錄云第一譯

法句經四卷

初出見長房錄別錄云第一譯

請賓頭盧法一卷

初出見內典錄別錄云第一出

阿毘曇九十八結經一卷

見僧祐錄別錄云單譯本以上四十一部五十六卷缺本

慧皎高僧傳安清字世高安息國王正后之太子也幼以孝行見稱志業聰敏刻意好學外國典籍及七曜五行醫方異術乃至鳥獸之聲無不綜達故僞異之聲早被西域王薨嗣父位乃深惟苦空厭離形器行服既畢遂讓國與叔出家修道博曉經藏尤精阿毘曇學諷持禪經備盡其妙既而游方宏化徧歷諸國以漢桓之初始到中夏才悟機敏一聞能達至止未久卽通習華言

於是宣譯眾經改梵爲漢出安般守意陰持入經大小
十二門及百六十品初外國三藏眾護撰述經要爲二
十七章高乃剖析護所集七章譯爲漢文卽道地經也
其先後所出經論凡三十九部義理明析文字允正辨
而不華質而不野凡在讀者皆疊疊而不倦焉

開元釋教錄世高本旣王子名高外國所以西方賓旅
猶呼安侯至今爲號焉天竺自稱書爲天書語爲天語
音訓詭審與漢殊異先後傳譯多致謬濫惟世高所出
爲羣譯之首安公以爲若及而稟不異見聖列代明德
咸讚而思焉道安錄僧祐出三藏記惠皎高僧傳等止
云高譯三十九部費長房錄便載一百七十六部今以

房錄所載多是別生從大部出未可以爲翻譯正數今
隨次刪之按刪去八十五部八十高以桓帝建和二年
戊子至靈帝建寧三年庚戌二十餘載譯大乘要慧等
經九十五部一百一十五卷

隋書經籍志曰至桓帝時有安息國沙門安靜齋經至
洛翻譯最爲通解

道行經一卷

光緒二年十月八日出見經後記朱士行漢錄

明者所撰安爲之序并注別

錄云後漢天竺沙門竺佛朔譯

般舟三昧經二卷

光緒二年十月八日出見經後記高僧傳

般舟三昧經或一卷第二出與大集賢護經等同

舊錄云大本別錄云第二譯右二部三卷其本並缺

慧皎高僧傳時有天竺沙門竺佛朔亦漢靈之時齋道

行經來適雒陽卽轉梵爲漢譯人時滯雖有失旨然棄
文存質深得經意朔又以光利二年於雒陽出般若三
昧云

開元釋教錄沙門竺佛朔印度人也識性明敏博綜多
能以靈帝光利之初齋道行經等來洛陽轉梵爲漢月
支沙門支讖傳語河南孟福字元士張蓮字少安筆受
並見經後記

隋書經籍志曰靈帝時有月支沙門支讖天竺沙門竺
佛朔並翻佛經

法鏡經二卷

安公云出方等部初出與寶積部伽長者會等
同本或一卷沙門嚴佛調康僧會注見僧祐錄

別錄云後漢安息優婆塞安

玄其沙門嚴佛朔譯第一譯

阿含口解十二因緣經一卷

亦云斷十二因緣經亦直云阿含口解別錄云單本右二

部三卷其本並在

慧皎高僧傳時又有優婆塞安元安息國人志性貞白深沈有理致博誦羣經多所通習亦以漢靈之末游賈維陽以功號曰騎都尉性虛靖溫恭常以法事爲己任漸解漢言志宣經典常與沙門講論道義世所謂都尉者也元與沙門嚴佛調共出法鏡經元口譯梵文佛調筆受理得音正盡經微旨郢匠之美見述後代

開元釋教錄玄以光和四年辛酉與沙門嚴佛調共出法鏡等經祐云法鏡佛調出者據其共譯以說又稱阿含口解世高譯者此乃姓同相濫也

謂梁釋僧祐三寶記以法鏡經出佛

調阿含口解出安世
高故智昇辨之云

成具光明定意經一卷

或云成具光明三昧經或直云成具

祐等三錄及高僧傳

別錄云

後漢西域三藏支曜譯

第二譯

阿那律八念經一卷

或直云八念經一名禪行斂意經舊錄

譯

馬有三相經一卷

亦云善馬有三相經出雜阿含經

馬有八態譬人經一卷

亦直云馬有八態經一名馬有八弊

譯房云
見吳錄

小道地經一卷

房云見吳錄
以上五部五卷見存

聞城十二因緣經一卷

第二出與世高譯十二因緣經同

大摩耶經一卷

或無大字或二卷初出與摩訶摩耶經

別錄云第一譯

賴吒和羅經一卷

出中阿含第三十一卷異譯房云見吳錄安云出方等部者或恐誤也

小本起經二卷

或云修行本起或云宿行本起近加小字耳初出與瑞應本起經等同本見舊錄及高僧

傳別錄云第一譯

墮落優婆塞經一卷

或云優婆塞房云見吳錄別錄云單譯本以上五部六卷缺本

慧皎高僧傳又有沙門支曜譯成具定意經及小本起等

開元釋教錄沙門支曜西域人博通羣典妙解幽微以靈帝中平二年乙丑於洛陽譯成具光明等經十部一十一卷

問地獄事經一卷

見朱士行漢錄及高僧傳別錄云後漢外國沙門康臣譯單譯本

慧皎高僧傳又有沙門康巨譯問地獄事經

開元釋教錄沙門康臣或作康巨未詳孰是西域人小
存游化志在弘宣以靈帝中平四年丁卯於洛陽譯問
地獄經言直理詣不加潤飾

輒首菩薩無上清淨分衛經二卷

一名決了諸法如幻化三昧經初出與大般若那伽

室利分等同本或一卷見長房錄

別錄云後漢臨淮沙門嚴佛調譯第一譯

慧上菩薩問大善權經二卷

初出與寶積大乘方便會等同本或無菩薩字或一卷見長房

錄別錄云第一譯

古維摩詰經二卷

初出與唐譯無垢稱經等同本見古錄漢錄別錄云第一譯

思意經一卷

亦云益意經初出見長房錄別錄云第一譯以上四部十卷本缺

菩薩內習六波羅蜜經一卷

安公云出方等部或云內六波羅蜜經亦云內外者見長房錄

此一部一卷見在

慧皎高僧傳沙門嚴佛調本臨淮人綺年穎悟敏而好

學世稱安侯謂安清都尉謂安玄佛調三人傳譯號為難繼

安公稱佛調出經省而不煩全本巧妙

開元釋教錄沙門嚴佛調亦云浮調費長房錄稱清信

士者非也臨淮郡人出家修道通譯經典見重於時以

靈帝中平五年戊辰於洛陽譯顛首菩薩等經五部

嚴可均全後漢文編曰嚴佛調或作浮調臨淮人官都

尉見支謙法句經序靈帝末出家通譯佛經與安世高安玄齊

名按此與慧皎智昇稱安玄為騎都尉異法句經序今未得見或佛調亦嘗為騎都尉歟

舍利佛摩訶目犍連游四衢經一卷出增一阿含第四十一卷異譯見別錄

云出阿含經馬王品後漢外國三藏康孟詳譯

興起行經二卷

亦名嚴誠俗緣經題云出雜藏見吳錄以上二部三卷見在

梵網經二卷

初出或三卷見吳錄別錄云第一譯

四諦經一卷

興平元年出第二譯出中阿含第七卷異譯與世高出者小異見竺道祖漢錄

太子本起瑞應經二卷

亦云瑞應本起第二出與過現因果經等同本別錄云第二譯

報福經一卷

或云福報錄云單譯本別

慧皎高僧傳又有沙門支曜康巨康孟詳等並以漢靈

獻之間有慧學之譽馳於京雒

開元釋教錄沙門康孟詳其先康居國人以獻帝興平

元年甲戌至建安四年己卯於洛陽譯游四衢等經六

部安公云孟詳所翻奕奕流便足騰玄趣也

修行本起經二卷

一名宿行本起第三出與瑞應舊本起經同本見始興錄別錄云後漢西域沙門

竺大力共康孟詳譯第三譯

右一部二卷其本見在

開元釋教錄沙門竺大力西域人情好遠游無憚艱險以獻帝建安二年丁丑三月於洛陽譯修行本起經其經梵本並是曇果與康孟詳於迦維羅衛國齋來康孟詳度語

中本起經二卷

或云太子中本起經見始興錄經初題云出

孟詳譯右一部二卷其本見在

別錄云後漢西域沙門曇果其康

慧皎高僧傳先是沙門曇果於迦維羅衛國得梵本中本起經及修行本起經孟詳其竺大力譯爲漢文

開元釋教錄沙門曇果西域人學該內外解通真俗於迦維羅衛國齋經梵本屆於洛陽以獻帝建安十二年

丁亥譯中本起經康孟詳度語內典錄中以曇果與孟詳共出遂與孟詳太子本起瑞應合爲一本者非也二經全異不可合之祐云中本起康孟詳出者據其共譯故耳

右後漢淄素一十二人其翻譯經律集一百五十一部二百三十七卷於中七十八部一百二卷見在七十三部一百三十五卷缺本

摩訶衍寶嚴經一卷

一名大迦葉品第二出與寶積普明菩薩會同本祐云摩訶乘寶嚴經

後出阿彌陀佛偈經一卷

或無經字第二出

未曾有經一卷

初出與唐譯甚希有經等同本

作佛形像經一卷

一名優填王作佛形像經一名作像因緣經與造立形像福報經同本

安宅神咒經一卷 亦云安宅呪法
祐云安宅呪

受十善戒經一卷

苦陰經一卷 出中阿含經第
二十五卷異譯

魔嬈亂經一卷 一名弊魔試目連經一名魔王入目健
蘭腹經出中阿含經第三十卷異譯

沙彌尼戒經一卷 或無
經字

優波離問佛經一卷 或云優
波離律

分別功德論四卷 或云分別功德
經或三卷五卷

禪要呵欲經一卷 題云禪要
經呵欲品

內身觀章句經一卷 或無
句字

雜譬喻政一卷 一名菩薩
度人經

六菩薩名一卷 房入藏云六菩
薩名亦當誦持

大方便佛報恩經七卷以上一十六部

般舟三昧念佛章經一卷是行品別翻第四出

阿彌陀佛偈一卷初出

賢劫千佛名經一卷祐云唯有佛名與曇無蘭所出四

梵本經四卷舊云胡本新改為梵似長安中出

泥洹後千歲變經四卷一名千歲變經祐云泥洹後千歲中變記一卷

諸佛經名二卷今疑是不思議功德經

三千佛名經一卷

稱揚百七十佛名經一卷直亦名百七十佛名今疑出稱揚功德經

南方佛名經一卷舊云一名治城寺經者非也此乃題寺為記非是經之異名

滅罪得福佛名一卷按滅罪是滅罪之誤

觀世音所說行法經一卷

是呪經

薩陀波崙菩薩求深般若圖像經一卷

受持佛名不墮惡道經一卷

五龍呪毒經一卷

取血氣神呪經一卷

舊錄血呪

呪賊呪法一卷

房云異出本
祿直云呪賊

七佛安宅神呪經一卷

菩薩受戒法經一卷

祿錄無經字
房云異出本

受菩薩戒次第十法一卷

菩薩懺悔法一卷

初發意菩薩常晝夜六時行五事一卷

頂生王因緣經一卷

舊錄云頂生王經

長者賢首經一卷

梵志喪女經一卷

獼猴鬻王經一卷

舊錄云獼猴經

勤苦泥犁經一卷

地獄經一卷

十一因緣章經一卷

舊錄云十一因緣經或云十二

沙門爲十二頭陀經一卷

僧名數事行一卷

比丘諸禁律一卷

摩訶僧祇律比丘要集一卷

一名摩訶僧祇部比丘隨用要集法

沙彌十戒經一卷

舊錄云沙彌戒

比丘尼十戒經一卷

賢者五戒經一卷

優婆塞威儀經一卷

庾伽三摩斯經一卷

譯言修行略一名達摩多羅菩薩撰禪經要集或言達摩多羅菩薩撰禪經要集

梵音偈本一卷

舊云胡音

讚七佛偈一卷

怛和尼百句一卷

五言詠頌本起一卷

一百四十二首

道行品諸經梵音解一卷

舊云胡音

法句譬喻經一卷

補錄云凡十七事或無喻字以上四十三部五十卷缺本

開元釋教錄曰右五十九部七十六卷並見僧祐失譯錄按長房等錄後漢失譯總有一百二十五部一百四十八卷今以餘六十六部七十一卷子細讐校非是失譯或翻譯有憑或別生疑偽今並刪也

按所刪六十六部名目智昇並

附載於篇其云失譯者失傳譯人姓名也

拔陂菩薩經一卷

或爲拔波或云陂陀安公云出方等部是般舟經第四品異譯第五出

栴檀樹經一卷

阿鳩留經一卷

菩薩道地經一卷

安公云出方等部

魔王入目犍蘭腹經一卷

亦云弊魔試目連經魔王入目連腹中經出中阿含第三十卷

佛有五百比丘經一卷

凡人有三事愚癡不足經一卷

佛語諸比丘經一卷

言我以天眼視天下人生死好醜尊
者卑者 安公云上三經出中阿含

自見自知爲能盡結經一卷

有四求經一卷

佛本行經一卷

河中大聚沫經一卷

或云水沫所飄經或云聚
沫譬經眾經錄出雜阿含

便賢者陀經一卷

陀字或
作旃

所非汝所經一卷

兩比丘得割經一卷

道德舍利日經一卷

舍利日在王舍國經一卷

獨居思維自念止經一卷

問所明種經一卷

欲從本相有經一卷

或云欲從本經

獨坐思惟意中生念經一卷

佛說如有諸比丘經一卷

比丘所求色經一卷

道有比丘經一卷

色爲非常念經一卷

色比丘念本起經一卷

善惡意經一卷

比丘一法相經一卷

有二力本經一卷

有三力經一卷

有四力經一卷

人有五力經一卷

不聞者類相聚經一卷

舊錄云類相聚經與相應相可經同本

天上釋爲故世在人中經一卷

或作無上誤也

爪頭土經一卷

身爲無有反復經一卷

師子畜生王經一卷

阿須倫子披羅門經一卷

披羅門子名不侵經一卷

生聞披羅門經一卷

舊錄云生聞梵志經

有際竭經一卷

善社乘披羅門經一卷

佛在拘薩國經一卷

佛在優曇國經一卷

經作優隨

是時自梵守經一卷

有三方便經一卷

舊錄云三方便經法經錄云出七處三觀

披羅門不信重經一卷

佛告舍日經一卷

四意止經一卷

舊錄云四意止本行法經錄云出中阿含

說人自說人骨不知腐經一卷

色比正念下二十五經安公云並出雜阿含

雜阿含三十三章經一卷法經錄云出雜阿含異本

五十五法誠經一卷或云五十五法行

一切義要一卷

說善惡道經一卷

愛欲聲經一卷一本云愛欲一聲經

摩訶遊曷淀經一卷

天王下作豬經一卷

始造浴佛時經一卷

十二賢者經一卷

佛併父弟訓達經一卷五十五法下九經安公云出阿毘曇

憂墮羅迦葉經一卷

四部本文經一卷

安公云上二經出長阿含一本云出阿毘曇

讓德經一卷

有賢者法經一卷

摩訶厥彌難問經一卷

或云大厥彌經

大本藏經一卷

說阿難持戒經一卷

阿難問何因緣持戒見世間貧亦現道貧經一卷

給孤獨四姓家問應受施經一卷

曉所諍不解經者經一卷

今疑上經字錯

奇異道家難問住處經一卷

奇異道家難問法本經一卷

賢者手力經一卷

入法行經一卷

憂多羅經一卷

或作夏字

栴檀調佛經一卷

惡人經一卷

難提和難經一卷

或云難提和羅經

四姓長者難經一卷

舊錄云四姓長者經

折佛經一卷

道地經中要語章一卷

或云小道地經今疑支曜出者是

數練意章一卷

舊錄云數練經安公云上二經出生經祐按今生經無此章名

開元釋教錄曰右八十二部八十三卷

初拔陵等三經見在餘者並缺

並是僧祐錄中集安公古典經旣云古典明是遠代今者編於漢末通前舊失譯經云五十九部七十六卷總一百四十一部一百五十八卷並爲漢代失源云

釋教錄曰又後漢劉氏都洛陽從明帝永平十年丁卯至獻帝延康元年庚子凡一十一帝一百五十四年緇素一十二人所出經律並新舊集失譯諸經總二百九十二部三百九十五卷於中九十七部一百三十一卷見在一百九十五部二百六十四卷缺本以爲後漢經錄云

按法苑珠林翻譯部云後漢朝傳譯道俗一十二人所出經律集等三百三十四部四百一十六卷失譯

經一百二十五部一百四十八卷此蓋據道宣大唐
內典錄所載之數內典錄今未得見其分別釐訂似
不及智昇開元釋教錄所次之密今故取以爲志

右翻譯之屬

支曜鈔首至問佛十四事經一卷

開元釋教錄沙門支曜傳云費長房等錄又有首至問
佛十四事經或無佛字余親見其本乃是經鈔未可以
爲翻譯正數已編別生錄內此刪不載

嚴佛調鈔迦葉詰阿難經一卷

開元釋教錄沙門嚴佛調傳云及長房等錄更有迦葉
詰阿難經亦云佛調所譯余親見其本乃是諸經之鈔

有數條事既是別生鈔經不爲翻譯正數今亦刪之

嚴佛調撰沙彌十慧經一卷

慧皎高僧傳調又撰十慧亦傳於世

開元釋教錄沙門嚴佛調傳云又有沙彌十慧經云佛調自撰并注序旣非聖言又缺其本今並刪之

嚴可均全後漢文編曰嚴佛調沙彌十慧章句序見釋藏跡字號十又見僧祐出三藏記第十卷

右鈔錄撰著之屬

右佛經凡二門綜二百九十五部

戴孟太微黃書十餘卷

葛洪神仙傳戴孟本姓燕名濟字仲微漢明帝時人也

入華山及武當山受裴君玉佩金璫經及受石精金光符復有太微黃書能周游名山

侯氏志曰御覽六百六十二引三洞珠囊曰戴公柏有太微黃書十餘卷壺公之師也康按據此則戴公柏卽戴孟蓋又有別名御覽六百七十三引太微黃書經

張陵道書

華陽國志漢中志漢末沛國張陵學道於蜀鶴鳴山造作道書自稱太清玄元以惑百姓陵死子衡傳其業衡死子魯傳其業魯字公祺以鬼道見信於益州牧劉焉太平廣記引神仙傳云張道陵者本太學書生博通五經著作道書二十四篇

范書劉焉傳焉爲益州牧沛人張魯母有姿色兼挾鬼

道往來焉家遂任魯以爲督義司馬遂與別部司馬張
修將兵掩殺漢中太守蘇固斷絕斜谷殺使者魯既得
漢中遂復殺張修而并其眾魯字公旗初祖父陵順帝
時客於蜀學道鶴鳴山中造作符書以惑百姓受其道
者輒出米五斗故謂之米賊

按漢中志作米道亦稱五斗米道

陵傳子

衡衡傳於魯魯遂自號師君其來學者初名爲鬼卒後
號祭酒祭酒各領部眾眾多者名曰理頭皆校以誠信
不聽欺妄有病但令首過而已諸祭酒各起義舍於路
同亭傳縣置米肉以給行旅食者量腹取足過多則鬼
能病之犯法者三原然後行刑不置長吏以祭酒爲理
民夷信向朝廷不能討遂就拜魯鎮夷中郎將領漢寧

太守通其貢獻魯自在漢川垂三十年曹操征之魯降
拜鎮南將軍封閬中侯邑萬戶將還中國待以客禮封
魯五子皆爲列侯魯卒諡曰原侯子富嗣

按通志藝文略有張道陵中山玉櫃神氣訣一卷剛
子丹訣一卷神仙得道靈藥經一卷峨眉山神異記
三卷白雲齋道藏目錄洞神部本文類云桓帝永壽
元年正月七日太上降蜀臨邛授天師張道陵北斗
延生經一卷又有南斗度人經東斗護命經西斗護
身經中斗保命經其卽世俗道流所謂五斗金章壽
生經者歟又太元部有太上三天正法經一卷亦云
太上道君授天師張道陵此皆陵所作道書之散見

者其眞僞莫得而詳已

陰長生書九篇

神仙傳陰長生者新野人也漢皇后之親屬聞馬鳴生得度世之道乃尋求之鳴生不教其度世之法但日夕與之高談論當世之事治農田之業如此十餘年長生不懈同時共事鳴生者十三人皆悉歸去惟長生執禮彌肅鳴生告之曰子眞能得道矣乃將入青城山中煮黃土爲金以示之立壇西面乃以太清神丹經授之鳴生別去長生乃歸所合之丹成服半劑不盡卽昇天著書九篇云上古仙者多矣不可盡論但漢興以來得仙者四十五人連余爲六矣二十人尸解餘並白日昇天

通志藝文略道家外丹類有赤龍金虎中鉛鍊七返丹砂訣一卷馬明生撰又有馬明君龍虎傳一卷不知是否卽此馬鳴生附識於此不別出

太平御覽六百六十四引陰君自序曰漢延光元年新野山北之子受仙君神丹要訣道成去世付之名山又著詩三篇以示將來也

又九百八十五引抱朴子曰漢末新野陰君合太清丹得仙其人本儒生有才思著詩及丹經讚并序述初學道陵師本末引以所知識之得仙者四十餘人甚分明也據此所云則葛稚川嘗見其書矣

陰長生修真君五精論一卷

通志藝文略道家內丹類修真君五精論一卷陰長生

撰

陰長生修三皇經一卷

通志藝文略道家外丹類三皇經一卷陰長生修宋史
藝文志陰長生三皇經一卷

陰長生注金丹訣一卷

通志藝文略道家外丹類注金丹訣一卷陰長生撰宋
史藝文志陰真君還丹歌一卷

白雲霽道藏目錄洞神部眾術類上清金液神丹經正
一天師張道陵序上卷言金液神丹經文本上古書義
不可解陰君作漢字顯出之合有五百四字言神丹中
卷長生陰真人撰鍊各丹法

樊英石壁文三卷

英始末見經部易類

抱朴子遐覽篇曰樊英石壁文三卷

白雲霽道藏目錄洞神部眾術類太清石壁記三卷楚澤先生編言丹法及丹經祕要口訣

按英南陽魯陽人南陽屬荊州刺史部其地近楚故稱楚澤先生其卽英之別號歟

太平清領書一百七十卷

范書襄楷傳楷好學博古善天文陰陽之術桓帝時宦官專朝政刑暴濫又比失皇子災異尤數延熹九年楷上疏言臣前上琅邪宮崇受于吉神書不合明聽復上書云前者宮崇所獻神書專以奉天地順五行爲本亦

有興國廣嗣之術其文易曉參同經典而順帝不行云云

襄楷傳又云初順帝時琅邪宮崇詣闕上其師于吉於曲陽泉水上所得神書百七十卷皆縹白素朱介青首朱目號太平清領書其言以陽陰五行爲家而多巫覡雜語有司奏崇所上妖妄不經迺收藏之後張角頗有其書焉范書劉焉傳注引典略曰熹平中妖賊大起漢中有張修爲太平道張角爲五斗米道使病者家出五斗米以爲常故號五斗米師也

章懷太子曰神書卽今道家太平經也其經以甲乙丙丁戊己庚辛壬癸爲部每部一十七卷也

宋史藝文志襄楷太平經一百七十卷

文獻經籍攷曰按道家之說皆昉於後漢桓帝之時今世所傳經典符錄以爲張道陵天師永壽年間受於老君者是也而太平經正出於此時范史所書甚明然隋以來藝文志道書中並不收入至宋中興史志方有之然以爲襄楷撰則非也今此經世所不見獨章懷太子所注漢書略及其一二如楷疏中所謂奉天地順五行者經中所言亦淺易無甚高論至所謂興國廣嗣之術則不過房中鄙褻之談耳楷好學博古於君昏政亂之時能詣闕上書明成瑨李雲之冤指常侍黃門之過不可謂非高明傑特之士而疏中獨再三尊信此書遂以來違背經誼假託神靈之効幾不免獄死惜哉然此經

流傳最古卷帙最多故附見於此于吉者後爲孫策所殺按順帝至孫策據江東之時垂七十年而吉於順帝時已爲宮崇之師則必非稚齒度其死時當過百歲必有長生久視之術然亦不克晦跡山林以全其天年而乃招集徒眾制作符水襲黃巾米賊之爲以取誅戮則亦不足稱也

按太平經見白雲齋道藏目錄太平部之首外受傳訓入五字號中是其書至明代嘗編入道藏今藏中或亦有之馬氏端臨謂世所不見但就其所見聞而言非眞亡佚也

魏伯陽周易參同契二卷

魏伯陽周易五相類一卷

後蜀彭曉序曰魏伯陽會稽上虞人修真潛默養志虛
無博瞻文詞通諸緯候乃約周易撰參同契三篇復作
補塞遺脫一篇所述多以寓言借事隱顯異文桓帝時
傳授同郡淳于叔通遂行於世參雜也同通也契合也
謂與周易理通而義合也抱朴子對俗篇曰得道之高
莫過伯陽伯陽有子名宗仕
魏為將軍有功封於段干也按老子之子宗為魏將
封於段干見史記老子列傳非此魏伯陽也蓋因老子
字伯陽神仙家遂傳訛如是大蛇見德陽殿上雒陽市令
搜神記曰桓帝即位有大蛇見德陽殿上雒陽市令
于翼曰蛇有鱗甲兵之象也見於省中將有椒房大臣
受甲兵之誅也乃棄官遁去開元占經一百二十引會
稽典錄曰淳于翼字
叔通除洛陽市長

宋俞琰曰參同契文委時去害與鬼為鄰委鬼魏字也

百世一下遨遊人間百一之下爲白人乃其旁之立人合之則伯字也湯遭阨際水旱隔井湯遭旱而無水易字也阨之阨際爲卩合之則陽字也此自解魏伯陽三字也

唐書經籍曰五行類周易參同契二卷魏伯陽撰周易五相類一卷魏伯陽撰藝文志魏伯陽周易參同契二卷又周易五相類一卷宋藝文志道家魏伯陽周易參同契三卷

四庫提要曰葛洪神仙傳稱魏伯陽作參同契五行相類凡三卷其說是周易其實假借爻象以論作丹之意世之儒者不知神丹之事多作陰陽注之殊失其旨云

云今按其書多借納甲之法言坎離水火龍虎鉛汞之
要以陰陽五行昏旦時刻爲進退持行之候後來言鑑
火者皆以是書爲鼻祖隋志不著錄唐經籍志始有易
參同契二卷周易五相類一卷而入之五行家殊非其
本旨至鄭樵通志藝文略始別立參同契一門載注本
一十九部今亦多佚亡

徐從事注周易參同契三卷

後蜀彭曉序曰魏伯陽撰參同契密示青州徐從事徐
乃隱名而注之

通志藝文略道家陰陽統略周易參同契三卷徐從事
注宋藝文志徐從事注周易參同契三卷

陰長生注金碧五相類參同契三卷

白雲霽道藏目錄洞神部眾術類金碧五相類參同契

三卷陰長生撰言外丹法又太元部周易參同契三卷

陰真人注

按此蓋卽洞神部中所錄之三卷

通志藝文略陰真君周易參同契三卷金碧五相類參

同契一卷陰真君撰

經義攷曰羅欽順云參同契有彭曉陳顯微儲華谷陰

真人俞琰陳致虛六家注皆能得其微旨

按此序陰真人於宋人中

豈宋別有陰真人白雲霽誤爲陰長生歟抑此注實宋人作附託陰長生者今姑錄之於此

魏伯陽大丹記一卷

通志藝文略道家外丹類大丹記一卷魏伯陽撰

白雲霽道藏目錄洞神部眾術類大丹記魏伯陽撰內
太素眞人口訣用藥斤兩訣火候訣眞鉛眞汞訣用藥
訣鼎器訣肘後訣

魏伯陽七返丹砂訣一卷

通志藝文略道家外丹類七返靈砂歌一卷後漢魏伯
陽撰黃君注

白雲霽道藏目錄洞仙部眾術類魏伯陽七返丹砂歌
黃童君注解內歌十首言丹砂藥物

魏伯陽內經一卷

抱朴子遐覽篇曰魏伯陽內經一卷

魏伯陽大丹九轉歌訣一卷

魏伯陽火鑑周天圖一卷

魏伯陽龍虎丹訣一卷

魏伯陽感應訣一卷

魏伯陽蓬萊山東西竈還丹歌一卷

通志藝文略道家外丹類大丹九轉歌訣一卷魏伯陽

撰火鑑周天圖一卷魏伯陽撰龍虎丹訣一卷魏伯陽

撰魏伯陽感應訣一卷蓬萊山東西竈還丹歌一卷魏

伯陽撰

又有魏真人還丹歌訣一卷
宋志有魏伯陽還丹訣一卷

魏伯陽百章集一卷

魏伯陽注太上金碧經一卷

陳振孫書錄解題神仙家百章集一卷稱魏伯陽太上

金碧經一卷題魏伯陽注

按以上魏伯陽書十部其真偽及重複互見皆不可攷

甘始容成陰道十卷

范書方術傳甘始東郭延年封君達三人者皆方士也率能行容成御婦人術或飲小便或自倒懸愛齋精氣不極視大言皆爲曹操所錄問其術而行之

魏志華陀傳注引文帝典論曰潁川卻儉甘陵甘始廬

江左慈並爲軍吏又引東阿王辨道論曰

陳思王植魏明帝太和三

年徙封東阿

世有方士吾王悉所招致甘陵有甘始能引氣

導引號三百歲老而有少容自諸術士咸共歸之然始

辭繁寡實頗有怪言始語余吾本師姓韓字世雄嘗與師於南海作金前後數四投數萬斤金於海始若遭秦始皇漢武帝則復爲徐市欒大之徒也

王應麟漢志攷證曰容成陰道二十六卷神仙傳曰甘始依容成元素之法更演益之爲十卷

右道書凡八家二十三部

四庫提要有曰漢志錄道家三十七部神仙家十部本截然兩途黃冠者流惡清淨之不足聳聽於是以丹方符籙炫耀其神怪名爲道家實皆神仙家也黃老之學漢代並稱然言道德者稱老子言靈異者稱黃帝名爲述說老子實皆依託黃帝也其恍惚誕妄爲儒者所不道又曰隋書載王儉七志

以道佛附見合爲七門阮孝緒七錄則以佛錄第六道錄第七共爲七門隋志則以四部之末附載道經佛經之總數而不列其目唐志以下頗載經目云云今從隋志附佛經道經書於四部之後兼用唐志以下之例備錄其書

後漢藝文志卷四